



ውዛረት ዐድል ወራታት ልጁን ዕሪት ትጌምም



እት አቅሊም ዐንሰቡ እብ ወዚረት ዐድል አሰይደ ፎውዝዩ ሃሽም እንዴ ትመርሐ፡ ምን ዮም 20 አክቶበር አሰክ 2 ንግሥት ዲብ ክሉ ምዴርያት እት ገብአ እጅትም፡ ልጁን ዕሪት ወራታቶም ቀየመው።

እብ አሳሰለ ትቀደመ ተቃሪር፡ ለትዮመመው ልጁን ምስል መስኡሊን እዳራት ደዋይሕ ከድሞ ክም ህለው ፡ ዲብ ዕሪት ለትተንከብ አግቡይ ባልሕት ቀደይ፡ ሽዑብ ሰኒ ልትከብቱ ክም ህለ፡

አድምዖቱ እግል ልደቀብ ህይ አተላላይ ለቡ ዲብ ሙጅተማዕ ለአተጅህ አትፋዝያት እብ ትወቀለት እግል ልግባኡ፡ ወዲብ ሽቅል ለልትርውኤ መጋድዕት እግል ልርታዕ ለልብል አፍካር ትቀደመ ወተህደገ እቱ።

እት ረአሰ እሊ መሻርከት ዲብ ቃትን ዓይላት ኤረትርዮ እግል ልትከምከም ለቡ አርእሰ ዐባዩ ወእሉ ለለአቀይም አፍካር እትክምስልሁመ ሰዋልፍ ሙጅተማዕ፡ ወአሳሰ መፍሁም ዐድል፡

መሳዋት ፡መስከብት ወምስል ሓለትን እት ገይሰ ጋራት ህድግ ወደው።

ወዚረት ዐድል አሰይደ ፎውዝዩ ሃሽም፡ ናይ እጅትማዕየት ወእቅትሳድ ውብዕድ ወራታት ሙጅተማዕነ ለወጅህ ናይ በህል ወለትወሰቀ ንዝም መንበረት ለወረሰህ ሽዑብ ክም ሕነ እንዴ ሽርሐት፡ እትለ ለህሌነ እት መርሐለት ቀዋኒን እን መስል “ ሰዋልፍን ህይ ሽርሐ፡ ምስል መባድእ ወዓዳት ግድለ ሰውረት ገይሰ ፡

ለልብል ሰኣላት በሊሰ ዋጅብ ዲብ ክህይብ እቱ እግል ንሸቄ ክም ወጅብነ አትፋቀደት።

ወዚረት ፎውዝዩ ዓይለት ብቅዕት አሳሰ ናይለ ዓይለት ዐባይ ለእምብለ ደውለት እግል ትግባኡ፡ እብ አክላቅያት፡ ደማንት ኖሴ ፍቲ ወርሕመት ሕድ፡ ወቀይ ወፍቲ ወጠን ታመት እግል ትግባእ ከዲም ለኢጸንሕ ዳይ ናይ ክሉ መዋጥን ክምቱ ሐበረት።

ዕሪት ክሉ ጅሃት ለለአተግንዕ፡ ሐል ዳይም መክሐደ ለትዐውት፡ አክር ወዐገብ እንዴ ነወከት ውፋቅ ወውሕደት መዋጥኒን ለተአደምን፡ ምን እንሸንን እብ ወእግል ነአተላላዩ እግል ልንከደም ለወጅብነ ሰዋልፍ ሙጅተማዕ ኤረትርያ ተ።

ዲብ አቅሊም ዐንሰቡ ዲብ ህለዩ 91 እዳራት ደዋይሕ እብ ዓመት 408 ልጁን ዕሪት እንዴ ትየመመው ሽቄ ህለው።

ኤረትርዮ ዲብ ርያድ እት ዋዕለ ሰያሐት ትሻርክ

ኤረትርዮ ዲብ ርያድ- ሰውድዮ እት ገብእ ለህለ 26ይ ዋዕለ ሰያሐት መዝመት መጅልስ ቅራን ትሻርክ ህሌት።

እትለ እብ ዐቅል ሰናዒ (AI) ለትተሌት ሰያሐት እት መስተቀበል እብ ገበይ ሐዳስ” እብ ትብል ሰቅራት ምን ዮም 7 አሰክ 11 ንግሥት ገብእ ለህለ ዋዕለ እብ መስኡለት ሽኡን ተንጌዚ ሰፋረት ኤረትርዮ አሰይደ ወይኒ ገረዝግሄር

ለትመርሐ ልኡክ ተአሻርክ ህሌት።

እትለ እብ ወዚር ሰያሐት ሰውድዮ አ’ሰይድ ኣሕመድ ኣልኸጢብ ለትከሰተ ዋዕለ፡ ሐድ 160 ወካይል አንፋር ድወል ውዘራእ፡ ውቁላም ሰብ ሰልጠት ለትፈናተየ መአሰሳት ወእድንያይ መዝማት ሻርኩ ህለው።

አሰይደ ወይኒ፡ እት አሰምዐተ ክሊመት፡ እት ኤረትርዮ ለህለ



ርዝቅ እት ሕሳብ ለኣቴት ሰናዕት ሰያሐት ዳይመት እግል ትጠውር መባደረት እንዴ አከደት ምስል ናይ እድንዮ ወመንጠቀት ሰብ ሽርከት ክም ትትዓወን አከደት።

እት ደንጎቤ ሼኻ ናሰር ኣልኖወይሰ ምን ሰነት 2026 አሰክ 2029 ኣሚንት ዓም እድንያይት መዝመት ሰያሐት መዝመት መጅልስ ቅራን (UNWTO) እግል ትግባእ ተሐፊት።

ግልዕ፡ እብ 8 ሚልዮን ነቅፈ ለትብነ ‘ከዛን ሼቆት’ ትደሕረ

እት አቅሊም ምግብ-እዳረት ዳሕየት ግልዕ፡ እብ ሰይይት እዳረት አቅሊም፡ መሸርዕ ዐዲ-ሃሎ፡ ሽርከት ብናእ ሰገን፡ ወዛረት ሐርስ ውብዕዳም አንፋር ቅዋት ድፋዕ እብ ዝያድ 8 ሚልዮን ነቅፈ ለትሸቀ ‘ከዛን ሼቆት’ እት ዮም 6 ንግሥት እብ ቃእድ ህይአት አርካን ወዛረት ድፋዕ ጄኔራል ፊሊጶስ ወልደዮውሃንስ ትደሕረ።

እሊ ዝያድ 83 ኣልፍ ምትር ሙከዐብ ማይ እግል ልጽብዋ ለቀድር ከዛን፡ 10 ምትር መትወቃል ወ72 ምትር ሰምዋ ለቡ እት ገብእ፡ አሰክ 8 ሄክታር እግል ለአግምል ክምስል ቀድር መስኡል ፈርዕ ብንዮት ተሓቲት ሐርስ መሀንድሰ አብርሃም ዳንኤል ሐበረ።

ሽቀየት ናይ እሊ ከዛን እግል ሰነን ረህየት ዐባይ ክምስል ከልቅ



ሰኣላይ ሮቤል መረሰዕ

ለሸርሐ ሙዲር ሙዲርየት ጋላ-ነፍሒ አሰይድ መሓሪ ዮውሃንስ፡ ዶር ናይለ እት ካድም ለትፈረረው

ጅሃት ሐምዴ ቀደመ። ቃእድ ናይለ እት ሽቁል ዶር ውቁል ለዐለ እሊ ወሕደት እብ

ተረቱ፡ እት እግል 5 ወርሕ ለአተላሊት ወራት ተጃርብ ዐቢ ክም ረክበው እት ለሐብር፡ ግረ

እለ ለልትህየቦም መሃም ዐማር ቅወት ዐባይ ክም ከልቀ እቶም አከደ።

መመቅረሓይ ሽቁል እዳረት አቅሊም ምግብ አሰይድ ዘርኢት ተወልደብርሃን እብ ተረቱ፡ እት ሐልፈ ወክድ ለትሸቀ ከዛንት ግልዕ-መዕጾ፡ ጤማምዮ፡ አፍደዩ፡ ዐዲ-ቄ፡ ድርፎ፡ ዓርቤ-ሬብዕ ወሰንጃብሉቅ ከደማት ህይብ ክምስል ህለ፡ ከዛንት ዐድ-ሓውሻ ወጸሎት ልትሸቄ ክም ህለ ወደሐ።

እት ደንጎቤ እት ብናእ ዶር ለአግደየ መአሰሳት ሽሃዳት ሐምዴ ተህየቡ።

እዳረት ዳሕየት ግልዕ፡ እት ሙዲርየት ጋለነፍሒ፡ ምን አሰመራ እብ ምፍጋር ጸሓይ ሐድ 11 ኪሎ ምትር ራይመት እት ገብእ፡ ዝያድ 540 ሰነን ቡ።

“በዲል ድወል በሐር ቀየሕ እግል ትግበእ ለትቀድር ሐለት ኢህሌት”

ሓይሰ ርኢስ ኢሰያስ አፈወርቂ ምን 30 ኦክቶበር አስክ 4 ኖቨምበር 2025 እት ጅምሁርየት መስር ናይ ሐምስ ምዕል ረስምየት ዝያረት ሸቅል ዋዲ ዐለ። እት መድሐራት ናይለ ለዐበ መትሐፍ መስርመ ሓድር ዐለ። ክምስልሁመ ምስል ርኢስ መስር ዐብደልፈተሕ አልሲሲ ህድግ ፋዴሕ ወደ። ምስሉ ሱፋር ለዐለ ሰሕፊ ሰለሕአዲን ሐሴን እብ ክሰሰ ዝያረቱ ወፍገራት መቃበለት ወደ ምስሉ። ለመቃበለት ምን ዐረቢ ዲብ ትግርኛ ለተርጀመየ ዑቕባሰሳሴ መሓሪቱ። ክልሹም መሐመድ ሀይ ዲብ ትግራይት ትርጅምተ ሀሌት። ታምም ጸገጠ እሊ ተሌቱ።

ሓይሰ ርኢስ ዓደት መድሐራት ዐቢ መትሐፍ መስር ከአፎ ዐለ። ተእሪካይ ጸባዩ ናይለ መትሐፍ ልግበእ ወለዲቡ ትቀደመ ዕፊ ከአፎ ትወሰፉ። ለመትሐፍ እግል ኖሱ ወእተ



መድሐራት ለትቀደመ መብርሂ ወተፋሲሉ ዐጀብ ዐጃይብ ዐለ። ፊትን ናይለ መዳሊቱ። ሐረከት ወብርሃን። እብ ክሉ ጀሃቱ ሸቅል ዐጃብ ትሸቀ። ምን ተጅርበት ወቅሪ ተእሪክ መስር እግል ንትነፊዕ። ለአፍካር ወዓዓት እግል ንንሸሩ ብከ። ለመናሰበት ሰኔት። ምን እሊ መቅደራት ፈን እግል ትነፊዕ ለተአትባሰ ተ። እት ሻረኮት እንዴ ኢንትሐጨር። መዋጥኒን እግል ለአመሩ

ወለአስተፊዶ ምኑ እት ዔማት አክባር እግል ነአርእዩ ብከ። ለዓደት መድሐራት ወእብ ክሰሰለ መትሐፍ ለትቀደመ መብርሂታት እብ ክሉ መቃይሱ ለልዐጅብ ተ። ሓይሰ ርኢስ ምስል ርኢስ ዐብደልፈተሕ አሲሲ ለወዲኩሙ ልቃእ ናገራቱ ሚተዝ እት አተራድ ወመትቀዳም ተእሪካይት ዕላቀት ክልኢተን ድወል ሀይ ሚ ግዴት እግል ተሀሌ እሉቱ።

እትለ መንጠቀት ሀለዮት ዕምቅ ለብእቱ ዕላቃት ብዙሕ ምህም ተ። ምናተ ለመትሰዳዳይ እት ክልኢት ለጃንብ ሌጠ ለተርፍ ኢኮን። ሓለት መንጠቀትን ወድዋርናመ ሀደግን እብ። ገባይል አፍሪቀ ወመንጠቀትን ለአተርህ ለሀለ አሸያእ ሀደግን እብ። ናይ ሕበር ስትራቴጂይ ፈሀምን ሀይ። ምን ተማሰ መትሀማሽ። በደ። መትአታይ ጋኑ። ኢመስኩብት ወሕሩብ እብ ከአፎ ትፈግር። እት መትሐልሓል

ምን እሊ ክሉ ለትሰዴ አርድየት እት አዋፍሖት ከአፎ ተአወቂ ቱ። ክምስልሁመ ቅልን እግል ነሐድሱ። በራምጅ ሕበር እግል ንተግብር። ኤታን እግል ነአፍግር። ብዕዳም ክም ሻርኮ እግል ንውዴ። ስትራቴጂይት ፈሃዐት ወአህዳፍ አብርሆት። ወምን ሀለ ዐቅም ጀላብ እግል ንትነፊዕ ዲብ ሓለት ሓድረት እብ ተፋሲል ገማኒ። እሊ ሀይ ለኢለኢትካርም ጅህድ ለጠልብ ቱ።

ለሀደፍ ረዩም ወተሐድያቱ ዐቢ ምንገብኡ። እት ናይ ክልኢትን ወእት ስትራቴጂያይ ዕላቃትን ለነአሰብቁ ነገሪ ሲያሰት አሀምየቱ ዐባይተ። እሊ ሀይ ፍንጌ አሀዳፍ መንጠቀት ወእድንያይት ሓለት መትዳባዋ እግል ለሀሌ ጠልብ። ወፍንጌን ትሉሉይ መትጋማይ እግል ለሀሌቱ። ዕላቀት ስትራቴጂየት በህለት በያን ሕበር አወጀት ሌጠ ኢኮን። ለዕላቀት ፍሬ እግል ትሀብ ሸቅል ብሹል ተሐዘ። ዲብ ገጽ 6 ልተላሌ....

ልኡክ ኤረትርዮ፡ ዲብ ካልአይ እድንያይ ወዕለ ዐማር እጅትማዕየት



እብ ቃይመት ሰፊረት ኤረትርዮ ዲብ መነዝመት ምጅልስ ቅራን አሰይዶ ሶፍየ ተሰፋማርያም ለትመርሐ ልኡክ ኤረትርዮ፡ ምን 4 አስክ 6 ኖቨምበር ዲብ ኣ’ደውሐ ቀጠር ዲብለ ገብአ 2ይ እድንያይ ዋዕለ ዐማር እጅትማዕየት ሻረከ። ሰፊረት ሶፍየ እትለ አስመዐተ ከሊመት፡ ዐማር እጅትማዕየት እብ ካርጅ ለልትቀሰብ መምሬሕ አውመ እብ መተንካብ ለተምም ሰበት ኢኮን። ሀመሌ ለኢለኢትሐዝዩ ሕቁቅ ሲያደት፡

ለትወቀለት መስኡልየት ወጠን፡ ክምስልሁመ አሳሰ ናይለ እብ ዐውል ቃሊ ለተአከደት ሕርየት ወጠን ክምቱ ሸርሐት። “ፈልሰፊት ዐማር ኤረትርዮ፡ ዲብ ክልኢት ዐምድ አሳሲ - መተንካብ ዲብ ኖስ ወዐዳለት እጅትማዕየት ለተአሰሳቱ።” ለቤለት ሰፊረት ሶፍየ፡ እሊ ሀይ ለትመሳወ ተጠውር ወዐማር ናይ ኩሉ ጀህት መጅተማዕ ለከድም ክምቱ አፍሀመት። ዲብ ደንገበ ሀይ፡ መጅትማዕ እዲን - ለትሳወ ተጠውር

ለለዐንቅፍ፡ እት ዐድል ለለኦጅሕፍ ሀይክል እግል ልወርኬ ዋጅብ ደሚር ክምቡ እንዴ ሐበረት፡ ፈዓልየት እብ በይን ለልትነሰእ ምስዳራት ቀሰብ እግል ልብጠር፡ ሸራኩት-አማን እግል ትትናየት፡ ክምስልሁመ መአሰሳት እዳረት እዲን እብ መጅብ ሐቅ ወሶት ናይ ኩለን ድወል አክል-ሕድ እግል ልግባእ ትፋኔት። እተ ወዕለ፡ ዝያድ 40 ሚርሐት ድወል ወሕኩማት ለብእቶም ወካይል ወሰብ-ምህነት ሻረከው።

ወራታት ጃልያት ኤረትርዮን ዲብ ካርጅ

ጃልያት ኤረትርዮን ሰነን ሰዊድን ወኢማራት፡ ፈሃዐት እግል ትትወቀል፡ ወመትንዛም እግል ልትደቀብ፡ መሻረከት እግል ትትወቀል፡ ክምስልሁመ ራትዐት ዕላመት ኤረትርዮ ወኤረትርያይ ለሸሬሕ በራምጅ ክመው። እብ አሳሰ እሊ፡ ጃልያት ኤርትራን ሰነን ሰዊድን ለነዝመያሁ፡ ዐዳት ወሰዋልፍ ቆምያት ኤረትርዮ ለለአርኤ፡ ተእሪክ ንዳልን ለለኢትአምር፡ ክምስልሁመ ኤማን ዲብ መጋበህት ወውሕደት ለለሓከ፡ ዲብ ኩለ ሰዊድን ለሀለየ መዳይን ዕውትት ሰልፋይት ‘አምዕል ጃልያት ኤርትርዮ ዲብ ሰዊድን’ ወደው። ነብረ ወመስተይ ዐድ እንዴ ትዳሉ፡ እብ ናይ ዓዳት ብበር-እደይ ወዕፊ ሰወር እንዴ ገረመ ዲብ ዕመር መርከዝ ዐዳጋታት ሸዕብ እብ ብዝሐ ለልትሐረክ ዲቡ አካናት ለገብአ

በርናምጅ፡ እብ ክሰሰ ኤረትርዮ ወሸዐበ ፈሀም እግል ልትወቀል ለአመመ ክምቱ፡ መስኡል መጅተማዕ ኤርትርዮ ዲብ ሰዊድን አሰይድ ቢንያም ምስግነ ሐበረ። እምበል እሊ፡ እብ መሕበር ወጠን ምሕርበት ምስኩ-ናም ሐርብ ኤረትርዮ ፈሬዕ ሰዊድን ለትንዝመ ሰሚናር፡ ዲብ መዳይን ስቶክሆልም፡ ኡፕሳላ፡ ዩተቦሬ፡ አረብኛ፡ ኡምዮ፡ ሳንድሺክ ወካትሪንሆልም ገብአ። እብ ናእብ መስኡል መሕበር ወጠን ምሕርበት ምስኩ-ናም ሐርብ ኤረትርዮ አሰይድ አብርሃም ክፍለጽዮን፡ ምሕርባይ ሰዩም ወልደማርያም ወነፈር ምግባይት ልጅነት መሕበር መስኡል ፈሬዕ ሰዊድን አሰይድ ተሸብቴ ፍሰዳይ ለትመርሐ ሰሚናር፡ ፈሃዐት እንዴ ትትወቀልት በራምጅ ወጠን እግል ልትወዕት እግል ልግባእ ዲብለ ወጅብ ወራታት ለረከዝ ዐለ።

ምሕርባይ ሰዩም ወልደማርያም (ግሪፒ)፡ መራሕል ንዳል፡ ወጠንየትን ወውሕደትን፡ ኤማን ወዶር ሸዕብ ኤረትርዮ እት ቀበት ዐድ ወካርጅ እብለ ክሰስ ተውዴሕ ርሒብ ሐቀለ ቀደመ፡ “ቃኑን ደረሰ - ነበርቱ” እብለ ልብል አርእሰ መሐደራት ቀደመ። እብ ጀህት ብዕደት፡ ዲብ ዱባይ - ኢማራት ለነብር ኤረትርዮን፡ ሓድረት ሓለት ወጠን እብ መጅብ ተጠውራት ናይ መንጠቀት ለሀደግ ሰሚናር ወደው። መመቅርሐይ ሸቅል መክተብ ዓም ቁንሰል ኤረትርዮ ዲብ ዱባይ ወቅብለት ኢማራት አሰይድ መሓመድ ማሕሙድ ሰሊም ወመስኡል ቅደይ ሸዕብ ወጃልያት አሰይድ ተሰፋ ገብረትንሳላ፡ እግል መሻርከት ተውዴሕ ርሒብ ቀደመው ወዲብለ ትቀደመ አስኢት በሊስ ሀበው።

ኤረትርዮ ወጃልያት

ክል አርቡዕ ለትጠ’በዕ ጀሪደት

መዳልያይ፡-
- መሐመድ እድሪስ

ለይአውት ወአርተዖት
* ዘሀረ ዐሊ
* ፋጥነ አድም

ተለፎን፡ 121797/201820 (258)
ፋክሲ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡163471-07588045

ኢትአመሮት፡
ተለፎን፡ 125013፡ ዕ.ሰ.ቡ፡ 1284

አሚረ ስምህር

ሹመ ወለት ዓምር መላጤ ምንተ ገብኦ? እብ ክሰሱ ሹመ ወለት ዓምር መላጤ እግል እክተብ ክምሰል ሐሰብኩ፡ ገሌ ብዙሕ ለኢኮን አክትብት እግል እቃልዕ ትቀሰብኩ። ለእብ ሚክኤሌ ራካ ሐሳመ ልትክተብ ታሪክ ኤራትርዮ ክምሰልሁመ እት ክታብ ተጃርብ ንዓል ጀራይም እስትዕማር እብ መሐመድ ሰዒድ ዑሰማን ለትክተብዮ ሰፍሓት ትመቲማመ ዐለው። እሊ ክምሰል መርጀዕ ቱ። ለተርፊኒ እግል ዐባይ ቆሚየት ትግሬ እግል እሰክል ምኑ ዐለ እግልዬ። እግል አጠዐዋት ልግበእ ወኣትራሽዶት ህዩ ለገብእ እግል ክቱብዬ ለሰዔ ኢወሰኩ እተ።

ሼክ ዓምር መላጤ እት ሰነት 1681 እት ቀርን አፍሪቀ፡ ርሒብ ሳሕል ለልትበህል ባኑት አፍዐበት ዐቢ ዐድ ወበዐል ሺመት፡ እግል ጠውረ መርሕ ለዐለ ስሙይ እናሰ ቱ። ዐድ ሹመ ወለት ዓምር መላጤ እት ርሒብ ሳሕል ለልትበህል፡ እት ድዋራት ናይ አዜ አፍዐበት ቱ ነብሮ ለዐለው። ዐድ ሹመ ጠውረ ልትበህሉ። ጠውረ ስሜት ፈረዕ ምን ቀቢለት አልመዳደ ቶም። ክሉ አፍረዐት ወቀባይል ምስል ሪም ወቅት ሰሩ እት በዔ፡ ወገሌሁመ እት ሰርት፡ ወሰምያት እት በድል ወቀይር እት ገይሱ ፈርዕ ጠውረ ሳኪን ስሜት እንዴ ኢትቀየር፡ አሰክ እሊ ወቅት እሊ ክታር ሄራረ ክምሰል ብዲረ ተኣተላሌ ለህሌት ፍርዕ አው ቀቢለት ተ።

እተ ወክድ ለህይ ወክድ ዝመት ወሰለብ ሰበት ዐሉ፡ ወእዲን እብ ግዲደ እት ተክዊናት እጅትማዕየት እት አፍረዕ ወቀቢለት ትተንከብ፡ ሰበት ዐለት፡ ለእት ርሒብ ሳሕል ዐለ ዐድ ሹመ ወለት ዓምር መላጤ፡ ምን እትጀህ ሱዳን ወሮ ለዐለው ቀባይል ፍንጅ ፈርህት ወራር እግል ኢልሳድፈ እት ፈርህት ትካፊት።

ጠውረ እግል አሰክ እምምት ለዐለት ብቆት ወራር እግል ትጋብህ ገብኦት ምንዲ ገብኦ፡ ትሩድ ወተጀርበት ዛይደት ላቡ ሚርሓይ ቀቢለት እግል ለህሌ እግላመ ላዝም ቱ ለዐለ። ለእት ርሒብ ሳሕል ሻፍፍ ለዐለ ዓምር ጠውረ ህዩ፡ እት ሐንቲ ፈዳቢት ሚርሒት ሼክ ዓምር መላጤ ቱ ለዐለ። ዓምር መላጤ ወሰለት (ገበይ) ለገቢሉ ወዳምሩ ለአነግፍ እበ ምን ውሒዝ ወራር ላዓይር ለዐለ እግል ልሕሰብ፡ አሰተብደ።

ሼክ ዓምር መላጤ ለሰልፋይ ሕርያን እግል መጋብህተ ወራር ለማጽእ ለዐለ እብ ገበይ ፍክር ወልባብ ወተድቢር፡ እብ ገበይ ተዓይሽ ስልሚ እግል ልሕሰብ አሰተብደ። ቀደመ ካልኦይ ለናይ ሒለት ወመጋብህት ፍክረት በህለት ቱ።

ፋንጂዩን ሰይጠራቶም እትሊ ናይ ዮም ቀላቅሎታት ምውዳቅ ጸሓይ፡ ወምፍጋር ጸሓይ ኤራትረዮ እብ ታመት ሰይጠረት አማደደው፡

፡ ዓምር ሼክ ዓምር አፍዐበት እት ታመት ፈርህት ትካፊ።

እትለ ወክድ ለህይ ሼክ ዓምር ክልኤ አዋልድ እብ መማኒት ገርበን ወግርመተን ለልትሐረዮ፡ ወክድ ድንግልናህን ለአትመመዋ ዋልድ ዐለ። ሚርሓይ ፋንጅ ለዐለ እናሰ እግል ሼክ ዓምር ሐቲ ምን አዋልዱ እግል ልህዔ ሰኣሉ እት ሼክ ዓምር አቅረቡ። ሼክ ዓምር መላጤ ሐር ሐር እንዴ ኢልብል ለእበ ምን ብቆት ወራር ዳምሩ ወገቢሉ ለአነግፍ፡ ወምስንዮት ሰኔት አሳሰ ሕውትነት ወመሳልም ግዋሬ ለወዴ እቡ በክት ሰበት ረክቡ፡ እብ ፈርሐት እግል ጠላብለ ሚርሓይል ፋንጅዩን ለዐለ አባር ሼክ ትክበተ። እብለ ህዩ ሹመ እሲተ እግል ርሒብ ሳሕል ለአሰተዐምር ማጽእ ለዐለ ቢዘ ዳምር ዐደ እንዴ ገብኦት ህዮብ አው ቅረዲት እት እንተ ትመልሼት እግሉ።

ሼክ ዓምር ለክልኤ አዋልዱ ሹመ ወፋዋን ክልኢተን እግል ሚርሐት ፋንጅ እት ሕርጊጎ አትህደዮን። መቃብል ህዳዩን ህዩ ሰላም ወመስኩብት እግል እት ሐንቲ ሚርሒቱ ለዐለ ገቢል አድመኑ። ሹመ እብ ዕምረ ሰኔ ንኢሽ እት እንተ እግል ሚርሓይ ደዮንት ለዐለ አባር እናሰ ተ ህዲት ለዐለት። እት ርሕመ ሕነት እንዴ ኢተዐቅር ምኑ ወክድ ነሰኦት። ህዳዩ ምስል ፋንጂዩን እበ ሳድፈ ምኖም ለዐለ አከይ መዓመለት እግል ተኣተላሌ ምስሉ ኢቀድረት። ሚ ክምሰል ሳደፈዮ፡ ሳብተት ሳኪን ለትደገመት ይህሉት። ሐቲ ምዕል ለእግል በ እንዴ ነሰኦት አሰክ ዐደ እግል ቲጊሰ አመመት። ምስል ትጃር ዐረብ እንዴ ትፋህመት ህዩ፡ ምስል ጀመል ሰር ላሊ እት ዳምር ሼክ ዓምር ተለው ወዴት።

ለምጽኦት ወለቱ ሹመ ለሰምዐ ሼክ ዓምር እሰልፍ ሰኔ ደንገጸ ምኑ። አሰክ ቤተ ወብእስ እግል ተኣቅብል ህዩ ብዙሕ አትሓለዩ። ሸንሂ እቺ ዲብ ልብለ ህዩ አትሓለዩ ወትረጀዩ። ሹመ ሳኪን “በተን ወአበደን ዮም ዩአቀብል ወፈጅር በደል እቱ አቀብል ሞት ሓርየት ህሌኮ” እት ትብል አትሓለዩ አብህ ወዐደ ዩም ስምዑ ኢገብኦት። እብለ ሼክ ዓምር ለእግል ሸኑክ ለዐለ ብቆት ውሒዝ ወራር አዜመ ምን ምጽኦቱ ፈርህ ወትረመጨ።

“አዜመ” ቤለ ሸክ ዓምር እግል ካልእ ፍክረት ምን ዐይረ ወራር ተኣንጊፋ እግል ልሕሰብ ዐለት እግሉ። ብእስ ሹመ ወለት ዓምር መላጤ አሰክ አብህ ሻፍግ ልኡክ እት ልልእክ ክምእኒ ቤለዮም፡ “ሹመ እብ ሻፍግ እት ቤተ ብለሰ። ለትሰረረተ እብ ሒለት እግል ትብሎሳቱ” ልብል ዐለ። ሼክ ዓምር እብ ጀህቲ፡ ወለቱ ክምሰል ኢመጸኦቱ ወመስኡልዮት ክምሰል ለአረፍዖም ረድ ሀበዮም። “ሹመ

በዴት” እት ትብህል መሰኦል በዳህ እት ሰሕል ወአውለት ትነሸረ። ሐቆ ወቅት ሳኪን ሼክ ዓምር ምን ወለቱ በሊስ ክም ጸብረ፡ እግል ካልእ ፍክረት እግል ልምሀዝ ሐሰቡ፡ ወክምሰል እሊ ህዩ ወደ፡ ክሉ ለሰካንል ዳምር እግል ሓዘ ሹመ እት ውቅል ወድህር እብ ላሊ ወአምዕል ትፈረረው። ብኣሳመ “እሊ መሰምስ እሊ እዘዋ ምኑ ሹመ አው እት ቤተ ብሎሰ አው እግል ትመጽእ ለህሌት መዋጅህት ትዳለው”፡ ላልብል ልኡክ መጸኣዩ።

ሼክ ዓምር ፈጅር ዮም ሐቲ ክሉ እግል ሓዘ ሹመ ፍሩር እት እንቱ ዳምር ርሒብ እተ ለትወቀለት ትንክለት እንዴ ፈግረ፡ (ኡይ) እብ መውዒ እት ወዴ እግል ክሉ ዜዝያይ



እት ልትራደእ እግል ልምጽኦ አጅበረ እቶም። ክሉም ክምሰል ትጀምዐው፡ እሊ ኢኮን እት እዴ ሼክ ዓምር ልባስ ሹመ እብ አድማይ እት ልትቃጠር አርእዮም። ሹመ እት ሐቲ ደብዐት ድራር ሐየት ክምሰል ገብኦት እብ አከይ መሰኦል አሰከለዮም። ክሉም ሰካንል ዳምር እበ ብቆት ለእት ረኣሰ ሹመ ወለት ዓምር መላጤ ጀሬት ሸሃደቶም ሀበው። ወእብሊ እት ዐደ ንጻፍ ሐዘኖም መደው። እግል ምን ብእስ ሹመ ማጽእ ለዐለ ልኡክመ መሰኦል ለእግል ሳደፈት ብቆት ደግመው እግሉ። አዜመ ሼክ ዓምር እብለ ልባብ (ዋይዲብ) እሊ ምን ብቆት ወራር ፋንጅ ዳምሩ አድሐኑ፡ ወመስኩብት ምን መኣከይ ምስል ግዋሬ አድመኑ።

እሊ ዋይዲብ እሊ እት ወዴ፡ ሼክ ዓምር እግል ሹመ ወለቱ አሰክለ ንኢሽ ሕተ ሃዴ ለዐለ አሕመድ ናይብ ደይረ ለዐለ ሕርጊጎ እብ መሰጠር ለአከዩ። ምስል ሹመ ምን ቤት ብእስ እምጽኦቱ ለዐለት ማል ወልባስ ህቱመ ናይ አብ ዋልዳይ እንዴ ወሰከ እንዴ ደሐረዮ ሳርሐዩ። ዐድ ብእስ ሕተ ሹመ ለዐለ አሕመድ

ዓምር ዐሊ ናይብ፡ እግል ሹመ እብ ገጽ ፋርሕ ትክበተው። ሹመ ክምሰል ስሜተ ሹም ክምሰልታመ እተ ለምሰል ዐድ ሕተ ፋዋን ወዴቱ ወክድ ትፈረገት። መናበረት ግንራራብ በሐር ምስል ሹመ ለናሰብ ይዐለ። ሹመ እት ብሩር ለዐቤት ወትረቤት ኡክት ሰገ ንዋይ ወሰታይ ሐሊብ ውጩር ወመጠቅ ላለምደት ምን ገብኦ፡ መንበሮ እት ሕርጊጎ ኢትክበተተ።

እብሊ አሰባብ እሊ ሹመ መናበረት እት ሕርጊጎ ሰበት ኢትክበተቱ እግል ብእስ ሕተ አሕመድ ዓምር ዐሊ ናይብ፡ እት ለዐቤት እቱ ሐዶት ብሩር ሕርየት ወሰይጠረት ለአጅዝ እግል ንዩተ አሰኦሉቱ። ህቱመ እት ጠለበ ዋፈቀ ምስለ። እት ዓይለት ገምሆት እግል ትንበር አጀዘ እግሉ። ዓይለት ምን ሕርጊጎ ብዙሕ ረዶም እንዴ ኢትገብኦ፡ ዐብደልረሱል ወዑሰማን ሸገራይ ለልቡሎም

እት ፍንጌ ክልኤ ቀቢለት ክላፍ ሐቆ ሳደፈ፡ ህዩ፡ ክሉ አሰክ ሹመ ገይሰ ወእብ ላብብ ፍክረት መሻክሉ ባልሕ ዐለ። ዐዳለት ለሰኣኑው ምን ዐድ ዐሸከር፡ መሰሐሊት፡ ገምሆት፡ ሕርጊጎ፡ ባጽዕ፡ ዐሰብ፡ ሕዋምሎ፡ ዐድ ናይብ፡ ዐብደልቃድር፡ ምን ክበረ፡ ሀያኪል፡ ደህለክ፡ ኖረ፡ ሐራት፡ ዳህል፡ እግል ዐዳለት ፍርድ አሰክ ሹመ እት ለአውህሉ መሻክሎም ወኣከይመቅረሐ ባለሐ ለዐለው ዐዶታት ቶም። ምን ዓይለትመ ለመጽኦው ዐለው።

ሹመ እብ ጸጎት ወናይረት ክብቱህ እግል ጋሻይ ሰምዐት ወሲረተ እት እዝን ክሉ ሴምዓይ ሰበት በጽሐት፡ ድጌህ እት ወቅት ሐጨር ተዐመረ። ምን ረዩም ወቅሩብ ህዩ ወሸዐ። ምን መንሰዕ ዐሳውርተ፡ ቶርዐ፡ ቤት-ጃክ፡ ሐባብ፡ ዐትማርያም፡ ሐማሴን፡ ውበዕዳም እት መጽኦ ርክን አምን ወሰላም፡ ገለብ ወሕጌ ምን መብእሰቶም፡ ፍቲሕ ወዐዳለት ምን ዝልም ጃውራም እግል ትግበእ እግሉም እት ልትሰኦሎ እት ዳምር ሹመ ዓምር ሐድረው። ምስል ሸዩም ዐዶም እንዴ ትብኣሰው ማጽኦም ለዐለው እንዴ ቅደዮም ባልሐት አሰክ ዐዶም እት በልሶም፡ ቅርብ ወዐዳላት ለሐዘው ህዩ፡ እብ እንክር ማነ ወገለበ ሐድረው።

እሊ ለሹመ ለአሰሰቱ ድጌ፡ ምን ክሉ አርካን ሐቆለ ተኣከቡ፡ (ዐድ ሹመ) ትበህለ። እብ ስሜተ ለተንበለ፡ ድጌ ሓድር ህተ እግል ኖሰ እት ሐዶት እዲን እት እንታቱ ለዐድ ሹመ ትሰመ። አሰክ እሊ ዮም ህዩ፡ ዐድ ሹመ ለኢለኦምር እት ዐድካ ኤራትርዮ የሀለ። አሕመድ ዓምር ናይብ በዐል ሕርጊጎ እግሉ ዋልበት እግል ተህብ ጨቅዋ ኢወደ እተ። ብእስ ሕተ ምን ገብኦ፡ ሰዓይቱ ሌጣ ቀድም እግል ዐለ።

እት ሒን ከረም ህዩ ሰካን ዐድ ሹመ አሰክ ሰለሙኑ ደብር መዐር፡ ፋጌን እንዴ ጌሰው ቶም ለሐርሶ ለዐለው። እግል ርዕዮ ንዋዮም ህዩ፡ እት መስክብ ርዕዮቶም ላለኣከርሞ። እተ ወክድ ለህይ ለሹመ እት ዓይለት መጸኦት እቱ ለሰካንል ባኑት ሐሊብ ወሐሰስ እግል አሕመድ ዓምር ናይብ ዋልበት እት ለህይቦ ጸንሐው። ምን ዓይለት ዋልበት ሓሊብ ወሐሰስ እት ባጽዕ እግል ለሕለቦ ልትቀሰቦ ዐለው። ሕሩይ እንሱሶም ምን ዓይለት እት መጡጠ ባጽዕ እግል ሊጊሶ እቡ አምር ህዩን የዐለ። ሐቆ ሺመት ሹመ ሳኪን፡ ብእስ ሕተ ለእግሉ ትትህየብ ለዐለት ዋልበት እግል ሹመ እግል ልሒሎብ አማውር ሃይብ ሰበት ዐለ። ገቢለ ባኑት ምን ካተሮት ገበይ ረዶም ረህ ወዓረፈ። ላመ ዋልበት ምነ ዕሰ ለአሕመድ ናይብ እዚዙ ለዐለ ሰበት አንቀሰቱ ሺመተ እብ ነሳሐት ትክበተው። እበ ለዐለት እግል ስምዐት ሰኔት እት ጸጎት ወዐዳለት ክሉ አሰክ ዐድ-ሹመ ትጎረተ። እት ወቅት ሺመት ሹመ ክሉ ለእተ ባኑት ነብር ለዐለ ልግበእ፡ ወለ ዐዳለተ ወጸጎተ እንዴ ሰምዐ ለመጸኦ፡ ድጌህ እት ወቅት ሐጨር ተዐመረ።

ሐጪር ተጸሪክ ሐያት ምሕርባይ ፍሰሃይ ሀይሌ ሰንጋል (አፍሮ)

(ዲብ ዓደት ቀብሩ ለትቀረጸ)



የም ጀላብ እለ ቃልየት ወጠን ወሽቦብ፡ ምን 78 ሰነት ፅምር ሐያቱ ለ52 ሰኖታት ለናደሉ፡ ሐቆ እለ ናይ ረዩም ሰኖታት ንዓል እግል ሕርየት፡ ብንዩት ወጠን ወሐሽሞት ስያደት መስኦልየት፡ እበ ለሳደፊዩ ሕማም ለአስተሽህድ እት ህለ አስክለ ናይ ደንጎበ ሐያቱ ለናደለ ገዳም ምሕርባይ ሙናድል ሓክም አቅሊም ምግብ አሰድ ፍሰሃይ ሀይሌ (አፍሮ) እብ ሕሽመት እንሳርሕ ህሌን።

ሽሂድ ምሕርባይ ፍሰሃይ ሀይሌ፡ ምን አቡሁ አሰድ ሀይሌ ሰንጋል ወምን እምሙ አሰደ ቅድስቲ መልካም እት ሰነት 1947 ዲብ ዐዱ አይቀበጹ ምዳርየት ዐረዘ ትወለደ። ሙናድል ፍሰሃይ ሰነት ፅምር ተፅሊም ክም በጽሐ ምን ሰነት 1955 አስክ 1971 መኣንብታይት ደረጀት ዲብ መድረሰት ዐዲ ጉረቶ፡ ምግባይ ደረጀት ዲብ መድረሰት ሕብረት ለዐለ አስመረ ወክልኦይ ደረጀት ህይ ዲብ መድረሰት ቀደማዊ ሀይሌ-ሰላሴ ለዐለት (ካልኦይ ደረጀት መድረሰት በሐር ቀየሕ አስመረ) ደርሱ። ዲብ ኩልየት ለትኣቱ ኑቅጠት ሰበት ረክበ ህይ መድርሰቱ እግል ለአተላላፊ አስክ አቶብዩ እንዴ ጌሰ እት ኣዲሰ-አበበ 'ኩልየት ብነ ደርሱ። እብ አድሻንሰድ ዲብሎም ደሐረ። መድረሰቱ ክም አትመመ ህይ ዲብ አቶብዩ ክፋል ደውለት በጌምድር እት 'ኤሰብ' (E.S.B.U.) ለትትበህል መአሰስት ትሰጀለ ምን ወሬሕ ጁላይ 1971 አስክ ዲሰምበር 1972 ህይ ሸቀ። ንዓል ሸዐብ ኤረትርየ እግል ሕርየት ንዓል ታርፊታት ሰበት ቱ፡ ምሕርባይ ፍሰሃይ አፍሮ መ ክም ጅዙእ ናይለ አተላላይ ወለዶታት፡ ዲበ እት ወክድ ለሀይ እብ ምስጢር መትካም ናድሎ ለዐለው አዕዳእ እንዴ ትካመ እት 1972 እት ምስጢር መትካም 'የሐሸ' ናይ ቅዋት ሸዕብየት ተሕሪር ኤረትርየ እንዴ ትካመ ንዓሉ አሰብደ። ምናተ ለክምኩም እተ ለዐለ ክላየት እብ አባይ ሰበት ተአመረት ወመስኦል ናይለ ክላየት ሰበት ተአሰረ፡ ምስል ካልኦይ ምን መራቀበት አባይ እንዴ መልጪ እት ወሬሕ ጁላይ 1973 አስክ ሚዳን ጌሰ ወ ናደለ።

ሐቆ እለ ሙናድል ፍሰሃይ፡ አስክ ወሬሕ ኣብሪል 1974 እት ዲሸ ሰርየት ተሰፋሂወት፡ ምን ወሬሕ ማርስ

1975 ህይ ዲብ ሃንደሰት ዐስከርየት ትዩመመ። ምን እለ ለትበህለ ወክድ እት ግራት አውልዕ፡ በለዘ፡ ዐዲ አቤይቶ ወወኪ ወዐድ-በለሰ-ሰ ድድ እስትዕማር ክምሰልሁ መ እት ናላይ ወሰከር ዲበ ለጉብኣ ሐርብ አድሕድ እብ ፈራሰት ለሻረክ ምሕርባይቱ።

ሙናድ ፍሰሃይ፡ እት ወሬሕ ማርስ 1975 ምን ዲሸ እት ጀማሂር መታበዐት መዳይን (06) ትቀየረ።

እብ አሳስ እለ፡-

*ምን ማርስ 1975-ጁላይ 1977 ሙካዘም፡

*ምን ጁላይ 1977 አስክ ጁላይ

1978 ሙካዘም ወመስኦል

መጀመ-ዐት፡

*ምን ጁላይ 1978 አስክ አጎስ

1979 ናይብ መስኦል አቅሊም

አስመረ ወድዋራት መዳይን ምፍጋር

ጸሓይ፡

*ምን አጎስ 1979 አስክ ማዮ

1981 መስኦል አቅሊም ቅብለት፡

*ወምን ኣብሪል 1981 አስክ ጁን

1987 መስኦል አቅሊም አስመረ

ወድዋራት መዳይን ምፍጋር ጸሓይ

እንዴ ጉብኣ ሸዐብ እት ካዘሞት

ወመሻረከቱ እት ንዓል እግል

አደቃብ ዐቢ ናይ ማርሒት ዶር

ለዐለ እሉ እብ ፈራሰት እንዴ ናደለ

ለልኣናድል ለዐለ ምሕርባይቱ።

አህዳፍ 06 እብ ዓመት ዲብ

መዳይን ለገብእ ህይ እብ ፍንቱይ

ክቡድ ሰበት ቱ ደረጀት ናይ ካዘሞት

እብ ፍንቱይ ምን ዓዲ አዕዳእ

አስክ ሰቡላም አዕዳእ ሙካዘማት

ዲብ አፍራየት፡ ፅምር እስትዕማር

እግል ሓጪሮት ወወውቲታት ሸዐብ

ኤረትርየ እግል አሻፋግ ወአደቃብ

ዲብ ለትፈናተየ መዳይን ክም አግደ

ህይ ዲብ መዳነ አስመረ ለትፈናተ

ዐመልያት ዲብ ምርሐት ወፈረንት

ሙናድል ፍሰሃይ ዶር ዐቢ ዐለ

እሉቱ።

ምን ጉብእ ለዐለ ነሻጣት ወዐመልያት

እግል ሸርሐት፡ መአሰሳት እቅትሳድ

እስትዕማር ንዛም ደርግ ደመሮት፡

መሳጢር አባይ እንዴ ጀምዐክ አስክ

ለክሰሰ አብጽሐት፡ ሐንቴ እስትዕማር

ለልትረከብ እግል ንዓል ለጉብእ

ሰላሕ ወሙምተለካት አስክ ሚዳን

ልእክት፡ እት ረአስ ሸዐብ ጀራይም

ለወዱ ወንዳል ዲብ ዐናቀፎት

ለልትፈረሮ ሰብ ሰልጠት አቶብዩ

ወጀዋሰሰ ከዋወት ንሰኣት ምን

ሙናድል ፍሰሃይ ዓቅሉ ወበቃዐቱ

ለአክደ እቶም ቶም።

እት ሰነት 1987 ሐቆ ካልኦይ

ሙአተመር ጀብህት ሸዕብየት እተ

ለጉብኣ መትካም እብ ደማማን ፈረዕ

ሰለሰ ወዓደን ሰበት ተአሰሰ ምር

ምን ለአሰሰም ህይ 06 ሰበት ዐለው፡

ሙናድል ፍሰሃይ አፍሮ መ እትሊ

ፈራዕ እለ ክም ልትሰሐብ ጉብኣ።

*ምን ጁን 1987 አስክ ሰብተምበር

1989 መስኦል አቅሊም አስመረ

ወድዋራት መዳይን ግብለት፡ *ምን

ሰብተምበር 1989 አስክ ሕርየት ህይ

መስኦል ፈራዕ ህጁም ሰለሰ እንዴ

ጉብኣ ምስለ ክቡድ ወረቂቅ ሀደፍ



ዲብ ካዘሞት ወወጅሆት ለትፈናተ ዐመልያት እብ በቃዐት ለመርሐ ሙናድልቱ።

ሐቆ ሕርየት ሙናድል ፍሰሃይ አፍሮ ዲብ ለትፈናተ አጅህዘት እዳረት ውዛራት እብ ለትፈናተ መስኦልያት በህለት፡-

*ምን ማዮ 1991 አስክ ኖቨምበር 1995 ናይብ ሓክም አቅሊም መዳነት አስመረ፡

*ምን ኖቨምበር 1995 አስክ ኖቨምበር 2002 መመቅረሓይ ሸቅል አቅሊም ቅብለት በሐር ቀየሕ፡



* ምን ኖቨምበር 2002 አስክ ማዮ 2013 ሙዲር ፈረዕ ግምሩክ ውዛረት ማልየት፡

*ምን ጁን 2013 አስክ 2014 ሙዲር ክጡዋ ጀው ውዛረት መዋሰላት ወእትሳላት፡

*ምን ማርስ 2014 አስክ ሰብተምበር 2020 ሓክም አቅሊም ጋሽ-በርክ

*ምን ሰብተምበር 2020 አስክ አምዕል እስትሸሃዱ ህይ ሓክም አቅሊም ምግብ እንዴ ጉብኣ እብ ውቅል በቃዐት ወመሰባል ለክድመ ሚርሓይቱ።

ሽሂድ ሙናድል ፍሰሃይ አፍሮ፡ ክም ዲብ ንዓል እግል ሕርየት ወሐቆ ሕርየት መ እግል ለትህየቡ፡ መስኦልየት ናይ ሸቅል መልህሆሙ እብ ነሰቅት፡ ዲበ ለትዩመመ እቱ ባካት ልትጋየስ ለዐለ ነሻጣት ልሰዕ ስያሰት፡ እቅትሳድ ወእጅትማዕየት በራምጃት ሸቅል እት ከጠጦት፡

ካዘሞት፡ ምርሐት ወራቀቦት ትርድት መቅደራት መልክ ለዐለ እግል ሰርገሎት ሸቅሉ ህይ ዶር ለአውፊ ምሕርባይቱ።

ሽሂድ ምሕርባይ ፍሰሃይ አፍሮ ናይ ናሱ አክላቅ ወጠባይዕ፡ ሃድእ፡ ምስል ክሉ ሐቡር ወዲብ አግቡይ ሸቅሉ ህይ ራትዕ፡ በዐል ሙብዳእ ወዕጹም ክም ዐለ ናይ ሸቅል መልህሆሙ ልሸህዶ።

ሽሂድ ሙናድል ፍሰሃይ ሀይሌ በዐል ዕያል ወአብ ሰለሰ ው'ላድ ቱ።

እብ ውቅል ንየት ወጠን መትሰባል ወሰባት ጀላብ ወጠን ወሸዐብ እቡ ለልትአመር ምሕርባይ ፍሰሃይ አፍሮ፡ ምን ረዩም ወክድ እበ ለሳደፊዩ ሕማም ዲብ ቀበት ዐድ ወካርጅ ልትሳረ ወራዐየት ጉብኣ እሉ ጸንሐ። እብ ፍንቱይ ዲብ እለ ለሐልፊ ወሬሕ እበ ለሳደፊዩ ሕማም እት እስብዳልየት ቅዋት ጀው ወአሮተ ትርድት መራዐየት

ትጉብእ እግሉ እንዴ ዐለት፡ እት የም 4 ኖቨምበር 2025 ሳዐት 9:30 አምሱይ አስተሽህዶ።

ዓደት ቀብሩ ህይ፡ የም 6 ኖቨምበር 2025 ሳዓት 10:00 ቀደም አገዛር ሓይሰ ርኢሰ ኢሰይዖስ አፈወርቂ፡ ውዘራእ፡ ሕካም አቃሊም፡ ውቁላም ሰብ-ሰልጠት ሕኩመት ወጀብህት፡ ቅደደት ዲሸ፡ ዓኢለት፡ መልህሆም ንዓሉ ወፈተቹ እት ለሐድረው ዲበ እት መቅበረት ምሕርባይት አስመረ ተመት።

ውዛረት አቃሊም - እዳረት አቅሊም ምግብ፡ እብ እስትሸሃድ ገዳም ሙናድል ፍሰሃይ ሀይሌ (አፍሮ) ለትሰመዐየ ሐዘን እት ሸርሐ፡ እግል ዓኢለቱ፡ አቃርቡ፡ ፈተቹ፡ መልህሆም ንዓሉ ወመሻቂቱ "ኤማን ለሀበኩም ወኤማን ለሀበኩ" ትብል።

ዝክር ዳይም እግል ሹህዳነ!
ዐውቲ እግል ገቢል!



ተጸሪክ ሐያት ሽሂድ ሙሳ መሐመድ-አድም (ወድ መንደር)

ሐያት ሽሂድ ሙሳ መሐመድ-አድም ስለሰጠ አስክ አርበኛ መውሰድ እግል ለሀሌ እግልክ ርዝቅ ተፈ። ዎሮ ምን እብሊ ርዝቅ እሊ ለልትአመሮ ምሐርበት ተፈ ሮመቲ እግል ዲመ እንሳፊሕ ለሀሌን። ካትብ፡ ሙመሰል፡ ሻዕር ወሰሕፊ ምናድል ገዲም ሙሳ መሐመድ አድም ወድ መንደር።

ዲብ ዮም 15 ማርች 1963 ምን አቡሁ አሰይድ መሐመድ አድም ወእሙ አሰይደ ፋዋን መሐመድ ሰሊም ዲብ ቃርዕላም - ምዴርየት ሀበሮ ለትወለደ ሙሴ እብ ዋልዴት ዲብ ልትራዲ ወዲብ ሐርስ ወርዕዮ ዲብ ልትዓወን ምስሎም ዲብ ዐዱ ዐበ። ምናተ፡ ምስሊ ዲብ ወክድ ለሀይ ለዐለ ጀራይም እስትዕማር ዲብ ረአሰ ላዴሕ ሽዐብ ወሐረከት ጀብህት ዲብ ባካት፡ ዲብ ሰውረት እንዲ ፈግረ ዕምር እስትዕማር እግል ለአትሐጭር እብ ባይኡ ለዐለ ዛይድ ሽዐር ወንየት ዲብ ንኡሽ ዕምሩ ዲብ ሰውረት ፈግረ።

ዲብ ሰነት 1977 ወድ 14 ሰነት ዲብ እንቱ ዲብ ጀብህት ተሕሪር ኤረትርየ ለተሐበረ ወድ መንደር፡ ምሐርባይ ዲብ ምን ዓዲ ጅንዲ አስክ ቃእድ ፈሰለት እንዲ ገብአ ዲብ ናደለ እቱ ወክድ ክልኤ ኢነት ጅረሕ ሳይፈዩ። ሐቀ መትፈንግር ጀብህት ተሕሪር ኤረትርየ፡ ለአንበተዩ ንዓል ጀላብ ሕርየት ዲብ መባጽሐ እግል ለአብዴሕ ወድ መንደር ዲብ ሰነት 1986 ዲብ ጀብህት ሽዕብየት ተሕሪር ኤረትርየ ተሐበረ፡ ዲብ ሀይኦት ተድራብ ህዬ ትየመመ። ምስሊ ዐለ እሉ ምዩል አው ዐሽም ነፈር ፍርቀት ዓዳት 'ሕመረት' ናይ ሀይኦት ተድራብ እንዲ ገብአ፡ ዲብ ምስሊ ጸንሐው ፈናኔን ምናድሊን ሐድ መቅደረቱ እት ወዲ፡ ዲብ ሽዐብ ወዲሽ ዲብ ገብእ ለዐለ አትፋዘየት፡ ክምሰል ኬትባይ፡ መቀድም በርናምጅ ወመመሰል ዶር ዐቢ አግደ።

ዲብ ሰነት 1992 ምን ወሬሕ ጃንዋሪ አስክ ወሬሕ ማዮ ነፈር ሽኡን ዓዳት እንዲ ገብአ ለአውቀ ሙሴ እብ ዐለ እቱ ዐሽም ወምዩል ዲብ ወሬሕ ጃን ናይለ ሰነት ለሀ ዲብ ቅሰም እዕላም ወዓዳት - ፍሬዕ ክርን ገቢል በርናምጅ ትግሬ ትየመመ። እብ ዕጹም ጠባይዑ ህዬ፡ ለሽቅል አገድ እግል ለአምሩ ወቅት ኢነስአ ምኑ። ዲብ ረዩም ለኢገብአ ወቅት ዎሮ ምን እሙራም ወሰሙያም ሱሕፍዩን በርናምጅ ትግሬይት እግል ልግበእ ቀድረ። መጥመጥሩ አካዳሚያይት መቅደረቱ እግል ልጠውር እግል ዲብ መደት ግድለ ሰለሕ ለአንበተዩ ምህሮ ሐቀ ሕርየትመ አተላለዩ።

ሙሳ መንደር፡ እግል ፈን እብ ፍንቱይ ህዬ እግል አምር ክቱብ ለትከላቃ ተ። ዲብ አምር ክቱብ ህግዩ ትግሬይት ፍንቱት መቅደረት ወብስር ዐለ እሉ። እብ ዝያድ ክሉ ለለአምረ ህግዩ ትግሬይት እግል ከትበዩ ወእብ ብዕዳም ለትከተብ ቅሰሰ ሐጨር፡ ክርንቱ ዲብ ባድል ቀርኡ ዲብ ህሉ፡ እብ ብዙሕ አዳም እብ ሸክል ተማሲል ልትቀደም ለህለ ዲኢኮን፡ ዎሮ ነፈር ቀድሙ ለህለ ኢመሰል። ዲብ ረአሰለ መፈተይ ክርንቱ፡ ዲብ ደሚር መተንሰየት ዋድሐት ለትትሐረክ ሱረት እግል ልክለቅ ለተአቀድር መቅደረት ዐለት እሉ። "ዕጨት ሕን" ለዕንዋን ቅሰት ሐጫር ዲብ ክርን ገቢል እንዲ ትቀረኡት፡ ምን መተንሰየት እዕጃብ ዛይድ ለረክበት ወለረክበ እባ ተ። እግል እለ ናይ ፈን መቅደረቱ ህዬ፡ ዲብ ረአሰለ ናይ ሰሓፊት ወእዳረት ዶሩ፡ ዲብ ጠወርት በራምጅ አታማም ጠለብ መተንሰየት በርናምጅ ትግሬይት ዶር ዐቢ ለአግደ እብ ናይ ዓዳት ወራታቱ ጃእዘት ለትሰርጋ ተ።

ሙሳ መንደር፡ ናይ ክልቀት ብስር ለቡ፡ በዐል ሙብደእ ወሰእየት ዐለ። ቡቲክ ሰእየት ምስሉ ኢትከለቀት። ዲብ ትሰደደ ናይ ሕማሙ መደትመ ምንገብእ ሰእየት እንዲ ትሰፊ፡ እግል ዐይለቱ፡ አቅራቡ፡ መሻቂቱ ወበጽሐቱ ሰእየት ለሀይብ ክምሰል ዐለ ለለአሙሩ ልሸህዶ እሉ።

ምን ወሬሕ ጃንዋሪ 2011 ዲብ ቅሰም ፊደዮ መስኡል ፈሬዕ በርናምጅ ትግሬ ወነፈር ቦርድ ክርን ገቢል ለዐለ ወድ መንደር፡ ሕማሙ ዲብ ልደቀብ ሰበት ጌሴ እብ ሕኩመት እግል ትወቀለ ዕላጅ አስክ ደውለት ህንድ ዲብ ትሳረሐ እቱ ወክድ፡ እብ ሰበትለ እንዲ ሐዩ ክምሰል አቅበለ ለወድዩ በራምጅቱ ለሐሰብ ወእግል ጠወርቱ ሳትት ለዐለ። ምስል ታመት ሰእየቱ ወትምኔቱ እንዲ ሐዩ እግል ለአቅብለሰ ዲብ ንታኬ ሳኪን፡ ዲብ ዮም 25 አክቶበር መሰእል እኩይ መጽኤ። 48 ሰነት ምን ዕምሩ እግል ሀደፍ ወጠን ለሰበለ ወድ መንደር ዲብ 62 ሰነት ምን ዕምሩ አስተሸህደ።

ዲብ ሰነት 1993 እብ ገዛም ህዳይ ጀብህት ሽዕብየት ተሕሪር ኤረትርየ ምስል አሰይደ ሐሊመ ዐብደልቃድር ዐመር ዐቅድ ለአሰረ ወድ መንደር፡ አብ ሰለሰ ውላድ ተ። ብክሩ እሙን ሙሳ ናይ ዋልዳዩ ፍንቱት መውሰድ ለወርሰት ፈናኔት ሰበት ገብኦት፡ ሙሳ እብ አርወሐቱ ትፈንቱን ዲኢኮን፡ እብ ወቀዩ ወገክርያቱ ምስልነ ሀለ።

እሊቱ ህዬ፡ ዓደት ቀብሩ ዮም ሰንበት ንኢሽ 8 ኖቨምበር 2025 ሳዕት 12 አድህር ውቁላም ሰብ ሰልጠት ሕኩመት ወጀብህት፡ ዐይለቱ ወአቃርቡ፡ ክምሰልሁመ ናይ ንዓል መልህያሙ፡ መሻቂቱ ወፈተቱ፡ ዲብ ሻረከው እቱ ዲብ መቅበረት ምሐርበት አስመረ እብ ነደረት ተመ።


ወዛረት እዕላም፡ እብ እስትሸሃድ ነፈረ ምናድል ሙሳ መሐመድ አድም ወድ መንደር ለትሰመዐዩ ሐዘን ዲብ ትሸሬሕ፡ እግል ዐይለቱ ናይ ንዓል መልሂቱ ወመሻቂቱ "ኤማን ወሰብ ለሀብኩም ወለሀበን" ትብል።

ዲብ መናሰበት እብ ስሜት ወዛረት እዕላም ወዘር የማኔ ገብረመስቀል ወእብ ስሜት ዐይለቱ ውላዱ ዕዘዲን ወናጂ ዕንባብ ከረው።

ዝክረት ዲመ እግል ሹህዳነ!
ዐውቱ እግል ገቢል!!



ምን ብግርም ለህለው ምን ድማን አስክ ድገለብ ሽሂድ ሙሳ መንደር ወስሌማን ዐሰማን ዓቢ ምን ግሉያም መ/እድረሰ፡ አማይር አድሓኑ ጊላዝጊ ወልዱ፡ ሰሊም ዐመር፡ ጳውሎስ ነታባይ፡ እዮብ አብርህ ወክልሹም መሐመድ



ሽሂድ ሙሳ መንደር እት መደት ሸብቱ



ምን ብግርም ለህለው ሽሂድ ሙሳ መንደር ምን ድማን አስክ ድገለብ ሳልሳይ





ምን ሰፍሐት ክልኤ ለአተላላ

መሰር ወኔረትርዮ ምሰል ሱዳን ለልትሓደደ ድወል ምንገብአዩ፤ ክልኢተን ዶል ለአመሕብረ ቀድሞት ሱዳን ዲሞ ትትረፈዱ። ከቀድሞት ሱዳን ሐል እግል ትርኩቡ እለ ለአዜ ሀሌት አከይራላት እግል ትሐለፍ ረአይ ሕበር ናይ ክልኢተን ድወል ሚ መሰል፤

መስከለት ሱዳን ለበበ ተሐዲ ናይ እለ መንጠቀትና ተ። ምናተ ለእለ በቤት ምን ተበቤ ሱዳንዩን እምበል መትኢታይ ካርጅ ጋራቶም እግል ልባልሑ፡ ሐዘነን እብ ኤማን ወሰባት እት ነጋቤ ወነአተርድ እግል ነአተላልያ ተ። እት ሱዳን ሐርብ አድራሕድ ሀለ ልትበሀል። ለአማን ላኪን ድዳተ። ሱዳን፡ ከይነት ወወራር እወጅ ወስቲር ጋብእ እተ ሀለ። ሰኒ ለተአግሄ ዛህረት። ሽዑብ ሱዳን፡ ሐቆ ሰለሰ ዐስር (ዕቁድ) እት ሓለት ሰኔት እግል ልትዐዲ ሐረከት ጥልቅት ሽዑብ አትበገሰ። ምናተ ለሓለት እግል ክምእነ ውጢት የዐለት። ሱዳንዩን፡ ሐቆ መርሐለት መዐደዩት ለለአሸቅዮም ጠሪቅ እግል ልርሰሞ ቀድሮ ዐለው። ደአም ሕየል ካርጅ እግል መርሐለት መዐደዩት እንዴ ሐባለከው፡ እት ሱዳን ወራርመ ወሻክል መጽአ። ምነ ሐረከት ሽዑብ ቀንጸት እተ አስክ እለ ለበደ ወቅት ወአብካት ቀሊል ኢኮን። ሐቆለ ሐረከት እት ክልኤ-ሰለሰ ሰነት ሐል አምጽአት ዲብ ልትቀደር፡ ለመሻክል አስክ እለ ለአተላላ ሀለ። ሰበት እለ ጸገም መሰር ወኔረትርዮ ውብዕዳም እግል ሱዳን ለሰዱ ጀሃት ምህም ተ። ወላዝም እብ ጅድዮት እግል ንሽቄ እቱ ብነ። እግል መትኢታይ ካርጅ መንገአት ፈቲሕ ለሀለ ሀሌ፡ እብ ዴማት አክባር ልትረኤ ለሀለ ሐማሻር ወተዝዊር ናይለ ሓለት ተ። እግል መሰል፡ አግዋር ሱዳን ላተን ድወል ለትሐይብ መባደረት መስር፡ ሀይፈ ቀድሞት ሱዳን እተ ኸለሰን አግዋር እንዴ እንዴ ተሐጨረት ሐል እግል ልትረከብ እላቱ ለዐለ። አኪድ ሀሌ፡ ለቀድሞት ምንቅሩብ ለአምራህ ወናይ ባልሐተ መቅደረት ዐለት እለን። ላኪን ተዐንቀፈደ። ናይ መንጠቀት መባደራትም ትሉሉይ መሓባልክ ገብእ እተ ሀለ። ምስል እለ አስቡር እለ ሕነ ክም አግዋር፡ ሐል እብ ሱዳንዩን እግል ልምጸእ ጅህድን እግል ነአተላላቲ። ሰበቡ ሀሌ ፍንጌ ሱዳን ወገባይል መንጠቀትን ስትራቲጂይት መሰለሐት ሕበር ሀሌት። ክለን ሕኩማት መንጠቀትን ሀሌ፡ ሽዑብ ሱዳን እግል ልሰደየ ወምን መሰደዱ

እግል ለአርሀየ እግል ልሸቀየ ዋጅበን ተ።

አምን ወመስከብት በሐር ቀየሕ እበ ከሰሰ ኤረትርዮ ወመሰር አዕዳእ ድወል በሐር ቀየሕ ወነሀር ኒል ምን ገብአየ ረአየን ከአፎ ቱ፤ ፍንጌ ድወል በሐር ቀየሕ ስርዐት መቅሬሕ እግል ተሀሌ ለገብእ ጅህድ ሕበር ሚ መሰል፤


እለ ቀድሞት እለ እብ ዕምቅ እግል ልትሀደግ እተ ወክድ ተሐዜ። ለበሐር ናይ ድወል ለመንጠቀት ሌጠ ኢኮን። ምን ምሒጥ ህንድ ወምሒጥ ሰላም ውብዕድ ማያታት ወዝያድ አህምየት ጂኦ-ሲያሰት ለብእቱ ከጥ ማይ ተ። በሐር ቀየሕ እግል እት ግንራሪብ ለሀለየ ኤረትርዮ ወመሰርመ፡ መስኦልየት ዐባይ ተአረፈዎ። ደሐን እለ ከጥ ማይ አድመኖት ሀሌ፡ እግል

ምንመ ለሀሌ፡ እለ ዳይ እለ ናይ ክልነ ጠለብ አሳሲ እግል ልግበእ እስኤ። ክል ደውለት ወሽዐበ ክም በዐል ሲያደት እብ መቅደረት ኖሰ ግንራሪብ እግል ትዕቀብ፡ ዲብ እለ ፍክረት አሳሰየት እግል ትተንከብ በ።

ካልኣይት፡ ድወል እግል እድንያይ ከጥ እብ ውፋቅ ቃኑኒ ወንዛም እግል ለአድምናሁ ደቅብ እግል ሊደየ ፍንጌህን ስርዐት ሰዳይት ሕድ እግል ተሀሌ በ። እግል ደማነት እለ ከጥ መዓሳክር ወመትኢታይ ሕየል መንጠቀት ወእድንየ ኢለአትሐዜ። አድመኖት ሐል ዳይም እግል መጽእ አጅያል ለተርፍ ተ።

ሳልሳይት፡ እግል መሰል እት ግንራሪብ በሐር ቀየሕ ለሀለየ ድወል ከጥ ማየን እግል ልዕቀብ መቅደረት አለበን ገአየ ምን ገብእ፡ ምን አመረ እግሉ

ዐስከሪ ለሰሜሕ ይማም በታተን እግል ለሀሌ አለበ። ንኩር ወኢቃኑናይ ሰበት ገብእ ሀሌ፡ ለለአመጽኦ ፍሬ አለበ። ሰበት እለ ሕነ ወመሰር እት ቀድሞት በሐር ቀየሕ እት ሐንቲ እለ ፈሀም እለ፡ እግል ክለን ድወል በሐር ቀየሕ ለልሐቅፍ ቲለል እግል ንክለቅ ላዝም ሐዘነን እግል ኒዴ ብነ። ሕነ ሌጠ ኢኮን፡ ክለን ድወል እለ መንጠቀት እኪት ገነሐ ሀለየ። እለ ፍክረት እለ ሐቂቅየት ሰበት ተ፡ ሐባላክ ወመትኢታይ ካርጅ ኢተሐዜ። ሰበት እለ፡ እድንያይ ከጥ ማይ ደማን እግል ልርከብ፡ እለ ንቃጥ እለ ክም ታምም ይማም እትለ ገብእ ናይ ፍንጌ ክልኦት ልግበእ ወዝያዳሁ እተ ለሀሌ መናሰባት እግል ነአቅርቡ ብነ። በሐር ቀየሕ ሀሌ እግል ክለን ድወል ወሽዑብ ዐለም ለትከድም በሐር ዐለም እግል



ድወል መንጠቀትን ወምነ በረ (እት ተፋሲል እንዴ ኢነአቲ) አስክለ ሕየል ለዐባዩ ቀድሞት ስትራቲጂየት ተ። ለመንካሳሁ፡ እብ ለትፈናተ ጀሃት ረአይ ብዙሕ መጽእ ወመትኢታይ በዜሕ እተ ገብእ። ሕነ ለእተ ግንራሪብ በሐር ቀየሕ ለሀሌን ድወል፡ እትለ ቀድሞት ረአይነ ባይን እግል ልግበእ በ። ክም ሕኩመት ኤረትርዮ እትለ ትፈናተ መናሰባት ለቀድምናህ 12 ንቅጠት ለብእተ ፍክረት ሀሌት።

አወላይት፡ ክል ደውለት እት በሐር ቀየሕ ለሀለ ሪም ግንራሪብ በሐረ ወምድረ ወሀለየተ እግል ትዕቀብ መቅደረት ኖሰ እግል ትምለክ ብእተ። ምን አመረ እለን ድወል እለን አምን እብ በቃዐት እግል ልዕቀብ ወሰክ መቅደረት አዳም ወአንዋል ለሐዝየ ገበእ። ምናተ እት በሐር ቀየሕ መቅደረት ከርሰ ናይ ክል ደውለት ለትበድል ሐለት ኢሀሌት። ገሌ ፈርግ

ለለዐቅብ እት ሐንቲ ቃኑን ዶር እድንያይ እግል ልምጸእ ቀድር። ላኪን ለገብአት ደውለት እብ ምስምስ አድመኖት ከጥ ማየ፡ ምስል ሕየል ዐባዩ አው ናይ መንጠቀት እትፋቅያት ትወዴ በሀለት ኢኮን። እለ መሰል አግቡይ እተ ድወል ብዙሕ መሓባልክ ወተሐድያት እግል ልዋሌ እተን ሰበት ቀድር፡ ንኩር ተ። ሰበት እለ ለገብእ ሐድ ቃኑን እግል ለሀሌ ብእቲ። መሰለን እትለ ንቅጠት ለሳልሳይት፡ ድወል እለ በሐር እግል ልዕቀብ መቅደረትን እንዴ በነየ ስርዐት እንዴ አፍገረየ ትሳደየ ምንገብእ፡ ለተሀደገ ክልኦት ሕርያን በደላሁ እግል ልክለቀ እት መጅልስ አምን አው መጅልስ ቅራን ለቀርብ፡ እት ፍንጌህን ውፋቅ ቃኑናይ እግል ለሀሌ በ። እግል ደማን ከጥ ማይመ እት መንጠቀት በሐር ቀየሕ መዐስከር ናይ ድወል ዐባዩ፡ አውመ ድድ ሐቲ ደውለት ዱቅሪ መትኢታይ

ትግበእ ብእተ።

ቀድሞት ሶማልመ ኤረትርዮ ወመሰር ዶል ለአመሕብረ ክል ዶል ለትረፈዕ ቀድሞት ተ። እት አስመረ ማርሐት ኤረትርዮ፡ መሰር ወሶማል ልቃእ ሰላሲ ዋድያም ዐለው። ሲያደት ሶማል እግል ትሕጠጥ፡ መአሰሳት ወጠኒ እግል ልትደቀብ ወውሕደት ሶማል እብ ሐዲስ እግል ትትኣከድ ሚ መሰል ጅህድ ሕበር ገብእ ሀለ፤ ልቃእን እት በሐር ቀየሕ ለትከረዐ የዐለ። በሐር ቀየሕ ምስል ባብ-አልመንደብ፡ ኸለጅ ዐደን፡ ግንራሪብ ሶማል ወምሒጥ ህንድ፡ እብ ዓመት ምስል ጂኦሲያሲያይ አህምየት ናይ እለ መንጠቀት ለልትጸበጥ ተ። እተ ሐልፈ መቃባት ክምለ ሽርሐክወ፡ ሶማል ሐድ 3000 ኪሎሜተር ለሪሙ ግንራሪብ በሐር ብእተ። አዜ ለሀሌት እተ፡ ሕዱድ ዐስተረ፡ በሐረ ወምድረ

ለለዐቅብ መአሰሳት ሲያዲ ለአለበ ደወለት ዋድቀት ጋብኦት እተ ለሀሌት ሓለት፡ እብ ናይ ከርሰ መቅደረት ለትወድዩ ሐድ ተ። እለ ግንራሪብ ረዩም እግል ትዕቀብ መቅደረት ኖሰ ላዝም እግል ትዕቤ በ። ምን በዲርነ ምን ቀደም ሕርየት፡ ሶማል እግል ትሕጠጥ እንሸቄ ሀሌነ። ሰበቡ ሀሌ በዲል ሶማልዩን ለገብእ ዎሮመ ኢሀለ። ናይ ደውለት መአሰሳት ሲያዲ እግል ተሀሌ ለተኣትሐዝዮም መቅደረት ላዝም እግል ተሀሌ እሉም በ። መአሰሳቶም እግል ልብነው ውቀት ወመቅደረት እግል ልሕዘዮም ቀድር። ኸለጅ ዐደን ወግንራሪብ ሶማልመ እተ ክምሰልሀ፡ የመን ወምን ለለትሐድድ ኸለጅ ሰበት ገብእ ላዝም ለመንጠቀት አምነት እግል ትግበእ ብእተ። ለተኣትሻቅል ላኪን፡ ገሌ ቅዋት ካርጅ ኣነን እግል ልጽበጦ ጀራሪቦቶም ተ። እት ሰቆጥረ መርከዝ ዐስከሪ እግል ጸቢጥ ጀርቤ ሀለ። ጀዘረት ሰቆጥረ ክትፈት የመን ትገብእ እት ሀሌት፡ እት ቀር አፍሪቀ ሀሌት። ለገብእ እት ጀዘረት ሚዩን ወባብ-አልመንደብ መርከዝ ዐስከሪ እግል ለአሰስ ክቡት ኢኮን። እተ ክምሰልሀ-መ ለገብአት ሐለት እት ዘቐር እንዴ መጽኦት መዐስከር እግል ቲዴ፡ ንኩር ተ። መሰለን ምን ሰቆጥረ አስክ ሚዩን ለሀሌት ጀግራፍየት ወሶማል እግል ካፈሎት ለገብእ ጀርቤ ዶል እንረኤ፡ ሲያሰት ካርጅ እግል አተግባር ለለአተቅድር መዐስከር እግል ልትአሰስ በክት ለለሀይብ ተ።

የመን ተሐልፍ እቡ ለሀሌት መስከብት ለበዴት ምኑ ቲለል እግል ኖሱ መዐስከር እግል ከወኖት እብ ሕየል እድንየ ለትሀመሀዘ መሻክል ተ። ሰበት እለ፡ እለ እት በሐር ቀየሕ፡ ኸለጅ ዐደን ወግንራሪብ ምሒጥ ህንድ ለሀሌት ብቅት እግል ትሸነክ፡ ሕድ ለሰዴ ናይ ከርሰ ወመንጠቀት ጅህድ እግል ለሀሌ ብእቲ። እግል በሐር ቀየሕ፡ ኸለጅ ዐደን ወምሒጥ ህንድ ለለትኣሳሰር ውፋቅ መንጠቀት ምንመ ኢሀለ፡ መስከብትለ መንጠቀት ላኪን እግል ተሀሌ ብእተ። ሰበት እለ ምን እለ ሓድረት ሐቂቀት እንዴ ትበገሰነ፡ ስትራቲጂይ ቆሪን ናይ እለ መንጠቀት እለ፡ እት ፍንጌ ሕኩማት ወገባይል መንተቀትን እግል ለሀሌ ለወጅቡ መትሰዳዳይ ወአ'ታምም አድራሕድ አህምየቱ ለበደን ተ። እለ ሀሌ መስኦልየት ተእሪካይት እንድኢኮን ሕርያን ኢኮን።

ሐምደክ ሓይስር ኢሰለ!

መራርተ- እለ ሰርሐክ!

መራርተ እለ ሰርሐክ - ብጋሰት ዱር ኢዱረ
 ሕማዋ ሐድገት ዲብ ኩሉ - ወአሸዋክ ገብአ ለአሱረ
 እት ከ'ብድ ዲብን ግያሰክ - እግል ዳወዮት ወሳረ
 ጎማት በይን ከለሰክ - ከብድክ ዐቤት ለበሕረ
 ሓድግ እንተ ለእማነት - እለ እኩይ ዐመለ
 ሓድግ እንተ ለምርዓት - ዱሉይ እንቱ ለዐሸለ
 ሓድግ እንተ መርዓዊ - ሸንጉል ለሰይፍ ኢገለ
 ሓድግ እንተ ደረሳይ - ለምን ኩልያት ኢትደሕረ
 ወሓድግ እንተ እለ ገቢል - ለምን ከበርክ ትሻቀለ
 በኩ ገብአ ሰፈርክ - ዲብ አልባብን ሊዐለ።



እንተ ለፋርስ ፍራስ - ሰይፍ ለቤቱ ኢትትአቱ
 እንተ ለሐየት ሓየት - ለሱራቱ ኢትትሰቱ
 እንተ በወ'ለ ዕለት - ብቁዕ ለግብእ ኢፈቱ
 ቀደም ግምክ ናደልክ - ከአሌፍ ትቤ ወሐቱ
 እብ ጀሀት ገለብ ወድማን - ክለሁ እንዴ ተአተርቱ
 አሰክ አክር ሕርየት - ወአሰክ ነስር ወዐውቱ
 ወእለ ወዴት ደይትብል - ወተአሪክ ኢተሓኬ
 እምበል ፊነ ትሳርሐክ ምኑ - እለ ገቢል እት በኬ።

አቅሎሌካበ ወትደሬክ - እለ መራር ሰጋደት
 ቀደም ጀላብ ሕርየት - ወሐሬ ዐቂብ ሰያደት
 ለንዳል ኩሉ ናድሉ - ወናይካበ ዝያደት
 ወቀይ እዴ ወንሳል - ምን ሕድ እንዴ ትትካበት
 ዘዐት ወጠን ምን በዲር - ዲብ አፋክ ትከተበት
 ምስል ደምክ ተአሰረት - ክምለ ዲብል ሕጃበት
 እንተ ዶ'ለ ደመልካ - ለሐየት ፋግር ምን ቃበት
 ወእንተ ዶ'ለ ሰሓቅክ - ለአመት ዲብክ ተዐጀበት።

እምበል እግል ትትዳዌ - ወትትዓለጅ እብ ሐኪም
 ምን ሓሰቡ ዐለ ሰፈርክ - ረአሰክ ቀደም እግል ተእሪም
 ዒማት ድጌ ኢሊጊስ - ለክም ሽክ ገብእ ወሐኪም
 ጸጋይ ለደብር ሕረሙ - ጌንሓይ ግዱዕ ወየቲም
 መትሐድራይለ ጋሾታት - እብ ሰለሶት ወደጊም
 ዮም ስበክ ትገደዓ - እት ቁሩብ ለሀለ ወእት ረዩም
 ወበነ ተረፈት ሬድዮክ - ለሓድግ ዐልክ እምበል ቀሪም።

ኢልትደቀብ ለጸርክ - ወበክት ለሓግል አኬቡ
 ምን ልድገሙ ለአሸዋክ- ለሹሀደእ ዐልክ ትበኬቡ
 ምን ለሐምብስ ክምሰልክ - ለምሒጥ 'ግል ልትዐዴቡ
 ምን ለአትሃጅኩ ለገቢል - ለእንተ ዐልክ ተዐሬቡ
 ምን ለተአሪክ ልሰክል - ከሸሪጥ ልምለእ ወቴቡ
 ወምን ለሓክዩ ምስጢር ንዳል - ለሰብኡ ሀለ በዴቡ
 ምን ገበእ ዕቅርት ልበርብር - ወእንዴ አመበተ ልክሬቡ።

ለፋግያት እንታቱ ጀላሉ - ሕሸሙቱ ወለሐበኩ



ገቢል ክርንክ እግል ልሰመዕ - ለፊድዮ ወዴ እት እዘኑ
 መንደር ለኢልብል አለቡ - ሱብ ሱግ ወለከደኑ
 እሹዎ እለ ታዕሊቅካ - ለአባይ ልትሀደድ ምኑ
 እሹዎ ለንሳል ድቁብ - ለዕጩይ ሳብር ወእበኑ
 ዎሮ ተምሳል ለአለቡ - ሸበህ ለልትሳነኑ
 ከአፎ ሰፈር ለአምም - ከብትሩ ለሐድግ እብ በኩ።

ለክርንክ ወድ መንደር - እለ መስል ኢትማነ
 ሙሳፍር አጅለ ልትገሴ - ወልውዕል በወ'ለ ክዋነ
 ክም ሰልክለ ረባበት - እት ክል ወተር ለትቃነ
 ክምለ ሐፋዝለ ፍርቃን - ለእብ ርዋያት ቁርኣነ
 ኩሉመ ኢነቅም አለቡ - ወናይክ ከብደ ሚዛ
 ዐስር ሶት ዲብ ሐቱ ሕልቅም - የዐለብናሁ እትረበነ
 ክርን አቤር ወሸባብ - ወግርዝ ለኩሻይ ጅነ
 ክርን አቦት ወመርዓት - ወአሰክ ናይለ ንዋይመ
 ዮም ቱ ትገደዐት መተንሰየት - ዒማት ለበቱሕ አዳመ
 ሕክም ሞላይ ረዳቱ - አምሩ ወዴ መምባክ።

ለፍንቲት ክለ መራር - ወናይ ሰሩ በናተ
 እት ድጌ ካምል ተአላይም - ከብዝሓም ሸዌ ለሃባተ
 ዮም ለትግራይት ነሸፈት - ሐቱ ም'ነ ሻካተ
 ምንለ ዘዐት ለጥዕም - ለክርን ሕራት ሰምዐተ
 ምነ ቅራኣት ለዳርገት - ለበዕለ ኢልብል ወተተእ
 ምነ ዒማት ለትዘሬ - ፍንቲት ለክታብተ
 ምንለ ወጅህ ለባርህ - ሰኔት ልርኤ ለአቅመተ
 ምን መስተቅበል ወዕ'ለት - ወእዴ ለብዝሕት ጭቅመተ
 ክም መልኣክ ኒበል ሚእክደር - እለ ነፍሱ ወሰፈተ
 እስታዝ ሙሰ ወድ መንደር - ርሕ ለዛይደት መሐበተ
 የዐለበናሁ እትረቢ - ሞላይ ወዴ ክም ፈተ።

ለመሰእል ኩሉ መራር ቱ - ረቢ ልክሩዑ ለከበር
 ወእት እንቱ ህዩ - ናይ ሙሰ ወድ መንደር
 ታክያት ደገ ሓድርቱ - እለ ዮም አጨምበ ለመሕበር
 ልትዓደሉ አለቡ - ወአክሉ ካይድ እት አሰር
 ወርሕ ዐስር አርበዕ ተሐበዐ - ከአጸልመተ ለዐስተር
 ሙሰ እለ ፍንቲቱ - ሸዐብ ተአገዳዕ ወዐስከር
 ለአንፋሰ ምነ ልትራብብ - ወርሕ ትገብእ ዲብ ከጠር
 ለሰን ምስሉ ጌሳቡ - ምርወት ወዕለት ወሐጠር
 እግል ልምበርቱ ተአሪኩ - እት አልባብ ኩሉ ለመዕሸር
 ሱብር ለሀበ ለእስረቱ - ህዱእ ልክሬ እተ ከትሕደር
 ኤማን ለሀቦም ፈተቹ - ዲብ ኬን ለሀለው ወእት እንሰር
 ወሀቱ ጅነት ትግበእ ሕራቡ - ምን መዕረ ልብረድ ወሰከር
 ጅነት ትግበእ መእዋሁ - ዲመ እተ 'ግልምበር።

ሳልሕ ሙሰ (ወድሐቢብ)

08/11/2025

ተመር ወመናፍቅ

ተመር እብል ትፋነት አንዋዕ ለሐሰት ነብረ ትትሐሰብ። እሊ ህዩ እብ ፈድላ ዲቡ ለልትረከቦ ለትፈተው መቀዝየት ክም፣ ፕሮቴናት፣ ሓጺን፣ ወእግል ገሮብ ለሞምቱ ቅያሰ ለአለቦም መናፍቅት ተ። ከእሊ ተሌ ገሌ ምኖም ተ።

1 - ተመር ሰራይ ረምጺጽት ወፍጋር ተ። ተመር ጀላብ ረምጺጽ ከብድ ክም ጠቢዓይ ሰራይ ነፌዕ። እሊ ህዩ እግለ ተመር መደት ምዕል ታመት ዲብ ማይ እንዴ አሽተርካሁ አሰባሕ-አሰባሕ ዶል ትሰትዩ ምሽክለት ለከብድከ ሐል እግል ትርከብ ትቀድር።

2 - ተመር እግል ከብድ ለአነ። ተመር እብ ትሉሉይ ዶል ልትነሰሕ። እግል ከብድ ምን ሕማም ምዕደት ክም ትትዓፊ ውብዕዳም ለትፈናተው ናይ ከብድ ሕማማት ክም ሳሬ ልትአመር።

3 - ተመር ሰራይ ለትፈናተው

ናይ ልብ ሕማማት ተ። ተመር እግል ዓፍየት ልብ ሰኒ ምህም ላቱ መዓድን ፖታሰዮም ልትረከብ እቱ። ወእት ረእሱመ እግል እት ደም ለትትረከብ ንሰበት ኮሊሰትሮል ክም ትደህር ወዴ። ወእብሊ ሰብብ ምን ጀልጠት ደም ወናይ ልብ አዝመት ዳፌዕ።

4 - ተመር ዔማት ጣቀት ወሐለት ተ። ተመር ውቅልት ንሰበት ናይ ሱከርያት ክም ከረ፣ ግሉተዝ ፍርክቶዝ ወሰክሮዝ ልትረከቦ ዲቡ። እብል ምስምስ ክም ዔማት ናይ ጣቀት ልትሐሰብ። ከተመር ዶል ትብሌዕ ምን ህትብ በረ ትገብእ ወእብ መዕጸም ወነሻዋ ትሽዕር።

5 - ተመር ዕላጅ አኔምዩ ተ። የምየን ተመር እንዴ ትመወንክ ምን ሕማም አኔምዩ (ሕዲነ ደም) እግል ትንጌ ትቀድር። እሊ ህዩ እብ ፈድላ ዲቡ ለልትረከቦ መዓድን ወካሰተን

ህዩ ሐጺን ልትረከብ ተ። ወእት ረእሱ እሊመ ሰራይ እብ ሰብብ ክሐሉል ለመጽእ ተሰምም ሰበት ተ። እሊ መሰል ተሰምም ዶል ጀሬ ተመር እግል ትትነሰእ ለአትሐዜ።

6 - እምበል እሊመ መናፍቅት ተመር ለልትባለብ ኢኮን። ተመር እግል ዓፍየት አንድብ። እግል ዐምሳት። መዳፈዕት ሰረጣን። እግል ቀውቶት ዐፍጥታት። ወክም ከረ ዐወር ላሊ ለመሰሎ ውብዕዳም የም አለቦም ሕማማት እግል ልዳሬዕ ወእግል ልሳሬ ቀድር። እብሊ ምስምስ ህዩ እሊ ብዙሕ ምናፍቅት እሊ እንዴ አመርኩ። ተመር ክል ዶል ክም ሙነት እግል ንትነፈዕ እበ ለአትሐዜ።

በህል

ሐቲ ዶል ቻርሊ ቻብልን እት ቀደምለ ጀምሁሩ እት በጥር እቱ ዐለ ወቅት። ሐቲ አጥዐሚቶ እለ ደግመ እሎም። ክሉ ለአዳም ብዙሕ ትሰሐቀ። አዜመ ካልእ ዶል ደግመየ እሉም። ገሌ አዳም ትሰሐቀ ወገሌሁ ትም ሌጠ ወደ። ቻርሊ ቻብልን እብል ኢበጥረ። ለአጥዐሚቶሁ ሳልሰ ዶል ደግመየ። እለ ሳልሰ ዶል ላተ ዎሮትመ ልትሰሐቅ ትሰአነ። ከምን እሊ እንዴ ትበገሰ እሊ ተሌ ዘየታት ሰኒ ቤለ።

• እብ ምስምስ ሐቲ አጥዐሚቶ እግል ትትሰሐቅ። ትትሰሐቅ ወትትሰሐቅ ትቀድር ሐቅ ኢገብአኩ። እግል ሚቱ እብ ሰብብ ሐቲ ምሽክለት ትበኪ። ትበኪ ወእትበኪ ተአተላላ! እለ ምን ገብእ ወለ ሐቲ ዶለቲትመ ትግበእ ናይ እለ ሐያትከ እት ለውቀት ሌጠ ሓልፈ።

ቻርሊ ቻብልን እምበል እሊመ እለን ተልየ ሰለሰ ልብ ለተምትመ ላባት ዘየታት ሓድግ ተ።

• እትለ እዲነ ዳይመት ተ አለቡ። ወለ ለመሻክልናመ ልግበእ።

• እት ወቅት ዝላም መጋይስ እፈቱ። እሊ ህዩ ለአናብዕዬ ዎሮትመ እግል ልርአየን ሰበት ይሐዜ ተ።

• ዲብ እለ እዲናከ በላሽ አብዴክዋ ለትብለ ምዕል ህሌት ምን ገብእ። ለምዕል ለእንዴ ኢትትሰሐቅ ሓለፍካሃ ተ። ከትሰሐቅ ወትለውቅ እለ እዲነ ሰኒ ሐጫር ተ።

ልብ

ዳረት ናፍቀትመ ኢትትሰአን

እሮት እናስ ምስል ወልዱ አሰክ ሐቲ መዲነት እግል ሰፈር ትበገሰው። ለገበዮም አሰክለ መዲነት ሐድ ክልኤ ምዕል ትነሰእ ዐለት። ዐፍሾም ለረፎ፣ እቱ አድግ ዐለ ጎሮም። ለእናስ ዶልከ ክም እለ ልብል ዐለ። ረቢ ሓብዐ ምኒ ለሀለ ቀላል ኢኮን!!

እትለ ገበዮም እት ለአሴሮ እት ምግብለ ምሽዋሮም ክም በጽሐው ለአድግ እግሩ ትሰበረት። ለእናስ ህዩ ክም እለ ቤለ። ረቢ ለሓብዐ ምኒ ሀለ ቀላል ኢኮን!!

ዎሮቶምተ ከዐፍሹ እት ፎቃዩ እንዴ ረፍዐ ገበዮም አተላለው። ሐቅ መደት አሴረረው ለእናስ እግሩ ትሰበረት ወሐለት ለጸሩ ረፈዕ እበ ሰአነ። ከለእግሩ እት ልሰሐብ። ረቢ ሓብዐ ምኒ ለሀለ ቀላል ኢኮን!! ቤለ።

ለጆና ለዐፍሹ ወዐፍሽ አቡሁ እንዴ ረፍዐ ገበዮም እግል ለአትምሞ ምግዓዞም አተላለው። እት ገበይ ለጀነ አርዌ ነክሸዩ። ወምን ክትርለ መጺጸት እትለ ገበይ ወድቀ። ለእናስ እለ ክም ረአ። ረቢ ሓብዐ ምኒ ለሀለ ቀላል ኢኮን ቤለ!!

ለጀነ ሰኒ ሓርቅ እት እንቱ እግል አቡሁ። ምን እለ ጸብጠትነ ለሀሌት ለተአኪ አዜ ህዩ ሚ ትትጸበረነ ህሌት? ቤለዩ።

ለጀነ እንዴ ትሸበህ ክም ሐየ ገበዮም አተላለው ወእትለ መዲነት በጽሐው። እለ ኢኮን ለመዲነት ምክራየ እንዴ ትቀዌት ጸንሐቶም። ለመዲነት አንቀጥቀጠን ሰበት አድመዐየ አብያተ ወአዳመ ከሉ ምስል ደከከ ወእምበል መሰእላይ እንዴ ከርበት ጸንሐቶም።

ለእናስ እትለ ወልዱ እንዴ ትወለበ ክም እለ ቤለዩ። ርኤ ወልዩ። እለ እትለ ምግዓዝን ለሳደፊነ መሳድድ ምን ኢሳድፊነ እትለ አምዕል ለሀ እትለ ወዲርነ ዐልነ ወምን እለ ለተአኪ ወሳደፊተነ ወምስለ ሃልካም ለሀለው ወሀለክ።

ክምን ሀመት ወመሻቅል እዲነ ወፈርሀት እግል ንድሐን ገብእን ምን ገብእ። እት ምዕላይት መንበረትነ እሊ መሰል ፈሀም እግል ለሀሌ እግልነ ለአትሐዜ። አከይ ተዋልል ሳደፊነ ምን ገብእ እግል ንሀመም ወንትሃለግ እቡ። ወተዋልል ሰኒ ሳደፊነ ምን ገብእ እግል ንትሀመል ወንትፈገዕ እሉ አለብኩ። እዲነ ጥዕመ ወመራረ ክምለ እትለ አምዕል ወላሊ ተን። ሐቲተ ከእግለ ሐቲ መንገእት ተአርሐ ወአሰር አሕድ ልተራተየ። ከለ ተዋልል እብ ገጸን ትወለባዮን ምን ገብእ ሐምዴ። ወፈሐሀን አርአዮን ምን ገብእ። እብ ሰብር እግል ንታከየን ብእትነ። ወምን አመረ እብ መንፈዕት ለተዐይረነ መደረትመ ኢትትሰአን።



ተበሰም

ጣዕት ዋልዳይት

ሐቲ እሊት እግል ሽበንከሌታይ ወልደ። ድግምለ ህግዩ ዋልዳይቱ ሰሚዕ ለይዐለ ዕዮት። ወሐር ምን ዐድ ክም አሬመ ድራር ከራይ ለገብእ እንዴ ዳገመት እሊ። ክም እነ እት ትብል ትሰአለቱ። “አዜ ህግዩ ዋልዳይቱ ሰሚዕ ለይዐለ ዕዮት ሚ ክም ጀሬት እቱ አመርከ ማሚ ... ?”

ህቱ ህዩ ክም እለ በልሰ ዲቡ። “ሰኒ አመርኩ። ከራይ ሌጠ በልዐቱ።” ቤለዩ።

ህተ ህዩ። “ሰኒ ህታተ ወልዩ ፈዳብ። እለ ህዩ ህግዩ ዋልዳይቱ ሰበት ኢሰምዐ ሌጣ ተ ለረክበ ተ።” ቲለቱ።

ለጀነ እት ዶሉ። “ህግዩ እሙ ለሰሚዕ ዕዮት ህዩ ሕነ እንበልዐ። ህታተ መኢኮን ይመ ... ?” ቤለዩ።



ጀላል ነቅፈ ማሌ ወዮም እበልብል አርእሱ፡ ምስል ገዳይም ውላድ ነቅፈ ላቶም እብ ክርን ለገብአት መቃበለት ወዲብ በርናምጅ ሬድዮ እብ ከፈፍል ለፈግረ፡ ነቅፈ ማሌ ሚ ትመሰል ዐለት፡ መንበረት አዳመ፡ ንዳቅ አብያተ፡ አደብ ወሕድርናት ውላድ ዲብ ነቅፈ ለዐለ ንዛም ተዕለም ክምስልሁመ አደብ ወእክላቅያት ደረሰ ወምደርሲን ለከሰስ 2ይ ክፈል እግል ንርኤ ከቅራኣት በኪተት፡

አሲድ መሐመድ ወድ ከንቲባይ ሐሰን ግረ እንዴ አቅበለ እብ ሰበት ነቅፈ ማሌ ዲብ ልትሃጌ ክእነልብል፡

“እተ ወክድ ለሀይ ክምስል እቤል ነቅፈ ክእነ ክምስል ኣዜ ፋይሐት ወዐባይ መዲነት ይዐለት። ንኢሽ ምን ክልኣት ሰፍ ለትትከወን መዲነት ዐለት። ለወክድ ለሀይ ሕነ እትሊ ኣዜ ህሌነ እቲ አብያትን ዐልኹ፡ ላኪን ናይላ መደት ለሀ አብያት ሰሩ መራቤፅ ወሰሩመ ዕሸሽ ዐለ። እተ መደት ለሀ ክእነ ክምስል ኣዜ እስብዳልየት ዐባይ ይዐለት። እድራስ ሐኪም ለልትበህል አጋር ሐኪም ዐለ። ላመ ዐለ እሉ ደወ ሐድ ወእመር ዐለ ህቲ ህይ ተንቲራ ቲ። ምን እሊ ወለዐል መቅደረት ይዐለት እሉ። ዛቲ እተ ወክድ ለሀይ ክእነ ክም ኣዜ ሕማማት ብዘሕ ይዐለ። እተ ጃምዕ ተሃጌን ምንገብእ እተ መደት ለሀ ጃምዕ ነቅፈ ንኡሽ ወአዳሙ ሐድ ወእማሙ ሐሞድ ሓጅ ዐሊ ዐለ። አምዕል ጅምዐት መጽእ ለዐለ አዳም ምነ ሪፍ (ብሩር) መጽእ ዐለ። ዲድ ህይ ዲብ እሊ ኣዜ ንሰሌ እቲ ለህሌነ ሚዳን ንሰሌ ዐልነ። ወእተ ወክድ ለሀይ ሕነ ለደረሰ እትሊ ሚዳን እሊ ኩረት ንተልሄ ዐልነ።”

አሲድ መሐመድ ዐብደላ እድራስ ዲብ እለ እስታዝ መሐመድ ልብለ ለዐለ ዲብ ወሰክ ክእነልብል፡

“ሕነ በዲር እለ መዲነት ሰኒ ንኢሽ ዐለት። እሊ ዮም እብ አብያት ማልእ ለህለ ድዋራት አብያት ይዐለ እቲ ክሉ ፈትሓት ዐለ። ዲብ ነቅፈ እተ ዘበን ለሕነ አሌሊነ እቲ ሐቲ መድረስት ወሐቲ ክልወት ዐለየ። አነ ቀደም መሐመድቲ ዲብ መድረስት ለአቲነ። ወእተ ወክድ ለሀይ እብ ዐረቢቲ እንደርሰ ለዐልነ። ሙዲረ መድረስት አቲጃኒ ለልትበህል ሱዳኒ ዐለ። ወለ እንደርሰ እብ ለዐልነ መንህጅ ህይ መንህጅ ምስሪ ዐለ። ወእብለ አነ ምን አወላይ አሰክ ሳልሳይ ፈሰል በጽሐኮ እተ ዲብ ራብዓይ ፈሰል ክምስል ሐለፍቲ ዲብ ሰነት 1958 ኣዘምኮ ምነ። እለ መድረስት እለ ምን እሊ ኣዜ ዲብ ነቅፈ ለህለ መዳርሰ ለፈንትዮ ህለ ምንገብእ፡ እተ መደት ለሀ ትሰብክ ወትሳግም ዐለት። ምን

ጀላል ነቅፈ ማሌ ወዮም



አሲድ መሐመድ ከንቲባይ ሐሰን



ከንቲባይ ዐሊ ከንቲባይ ዐስማን



አሲድ መሐመድ ዐብደላ እድራስ

ነቅፈ አሰክ ቅብለት ሳሕል መብአ ወአልጌነ እብ መደርሰነ ወፖሊሰ ትሰብክ። እተ መደት ለሀት ለበዝሐ ሰነን ነቅፈ ሰብክ ወሳግም ዐለ። ለለሓጌ ምኑ ሐድ ቲ ለዐለ። ወሐቅ እሊቲ መድረስት ሐሬ እብሊ ኣዜ ልህሌቲ ሸክል እብ ጥወርት ገበይ ለትብኔት ወክምስል ትብኔት ህይ ሐድረት። ለወክድ ለሀይ አነ ይሐደርኩወ። ሕነ ዲብ መደት ሕክም ፈደራሊ እንደርሰ ዐልነ። ዲብ እለ መዲነት ምን መሰወፅ ዐድ አናቲ ወዐድ ድሕሊ ዐለወ።

ደዋዬሕ ነቅፈ እተ መደት ለሀ ሚ መስል ዐለ እተ ልብል ሰኣል እት በልስ አሲድ መሐመድ ዐብደላ ክእነልብል፡

ደዋዬሕ ነቅፈ እተ መደት ለሀ ዕጩዩ ጋምል ወሐዋናት ከደን ክምስል ከረ ነላት ወገረዊት እብ ምሉእ ዐለ። እሊ ህይ ለመዲነት በረህ ልግበእ ወቀብተ ቃባት ዐለ። እሊቲ ህይ ግርመት ናይላ ወክድ

ወዱ ዐለወ። ህቶም ህይ ዕጩይ እግል ኢልትባተክ ወኢልክረብ ወገረዊት እግል ኢልትቃተል ታቦዮ ዐለወ። እግልሚ እተ መደት ለሀ ገርወ አው ነለት ቀተልክ ምንገብእ ቅራመት አልፍ ርዶል ዐለ። አልፍ ርዶል ምን አየ ትፍረክቡ። እብሊ ለፍሩሰታሌ ዲብ አብቁል እንዴ ትጸዕነው ምን እለ ዲብለ ብሩር ወረደም አካናት አሰክ ከረ ሮረ ሐብብ እንዴ ፈግረው ምሩር ወዱ ዐለወ።

መደት ሐቲ ዲብ እለ አካን ምሮ እናሰ ገርወ ቀትለ ወሐር ጽብጠወ። ወሐር እብ ፈድል ከንቲባይ ዕሰማን እንዴ ደመነዩ ጠለቀ። ከዲበ መደት ለሀ መራቀብት ወመርዲት ሐዋናት ከደን ወዕጩይ ትሩድ ዐለ። ለገረዊት ቀትሎ ለዐለው እንዴ ተሐበወቶም ለቀትሎ ዲኢትን አዳም ዲብ ልርኤክ ነለት አው ገርወ ልትቀተል ይዐለ። ለገረዊት ወለነላታት አሰክለ ምን እለ ነቅፈ እብ ሰብብ ሐርብ ፈገርነ ክመ ሐ

ሕድ ነብር ዐለ። እብ ክእነ ህይ ማይ ለእነሰእ ምኑ ወለ ነሐድር እቲ አካናት እመር ዐለ። ምነ ናይ ሕምግሌለ አካናትን ህይ ከረ ጠባጥ፡ ጥልፎ፡ መንበር ሀረድብ አው መድረርየት፡ ወድጃቡ ፈልክት ዲብ እምብልቲ አሰክለ መንዘል አውልነ ለእንሰብክ። ሐቅ ናይ ሳምን ሰፈር እብ መጽዕን ህይ አልጌነ ወመብአ እንዘጽሕ ዲብ ነአውል። ላመ ምን ነቅፈ ለትሰብክ መድረስትን ዲብ ድራሰተ ተአነብት።

እትሊ ወክድ እሊ ሸዐብ ነቅፈ ገባይል ለአምር ይዐለ። ክምስል ሐቲ ዐሽረት ለዐይሽ ወልትናበር ዐለ። ገቢላቹ ገቢላትክ ሐሬ አሰክ ሱዳን እብ ሰብብ እስትዕማር ክምስል ለአጅኣነ አመርናህ። ከንቲባይ ዐሊ ምን መሐመድ ከንቲባይ ሐሰን ወመሐመድ ዐብደላ እድራስ ልንእኸ። ላኪን ህቲመ እብ ልብ ንእሹ እብ ክሰሰ ነቅፈ ማሌ ለልዘኩ ብዘሕቲ። ምሮ

ምኑ ህይ ሱግ ነቅፈ እተ መደት ለሀ ሚ መስል ክምስል ዐለ ዲብ ለሓኬ ክእነ ወሰክ፡


“ለሱግ ለእቡ ትሰአሎ ዐልኩም ወመጃሚዕ ለእለ ሳመው እግልኩ፡ ሰር መጃሚዕ ምን እሎም ሳሙዎም ለዐለው ለገደመው ቶም። ሓምዳን ወድ መሐመድ ሳልሕ፡ ዐስማን ፈጋርየ፡ ሐሞድ ኢብራሂም ጨበፅ፡ ሙክታር ወድ መሐመድ ዐስማን ወድ ዐብዱ፡ ለሰፍ ለካልኣይ አሰልፍ ለአስተብደየ፡ ሙክታር ወድ መሐመድ ዐስማን ቲ።

አማንቲ ነቅፈ ማሌ ወነቅፈ ዮም እት ብዝሐ ሸዐበ ተክጢጥ መዲነት፡ ዲብለ ህለ እተ መአሰሳት ዲብ ሕድ ኢቀርቡ ሐቲ ከናየ ታሪክ ወናየ መባትክ ወርዝቅ በን። ነቅፈ ዲብ ዘበን እስትዕማር ክእነ ክምስል ዮም እስብዳልየት ዐባይ ይዐለት እተ። ክመ መሐመድ ከንቲባይ ሐሰን ለቤለየ፡ አጋር ሐኪም ወሐሬ ሀደፍ ናዮም ሙብሸሪን ለዐለው ምን አርብ ለመጽአው እስብዴስ ዐለው እተ።

አሲድ መሐመድ እብ ክሰሰ እስብዴስ ተውዴሕ ዲብ ለሀይብ ክእነልብል፡

“እስብዴስ እትለ ጠብዐን ሙብሸሪን ዲብ እንቶም መጽአው። ወእተ ወክድ ለሀይ አነ ትርጃማን ናዮም ዐልኩ። ሙሳንደር ለልቡለ ዲብ እለ አካን ለኣዜ ጋራጅ ሕኩመት ለብእተ ዲብ አብያት ዐለ። ለአብያት ሚዶል ብኩይ ክምስልቲ ይአምር። ላኪን ሀደፍ ናይ እለ እስብዴስ እግል ሕክምናቲ ልትበህል።

ልተላሌ....



ለሀይ ለሸፊሕ። እምበል እሊ ዲብ ነቅፈ እተ መደት ለሀ መክዘን ዐቢ ዐለ። እሊ መክዘን እሊ ናይ ሐሸራት ቲ ለዐለ። እሊ መክዘን እሊ እብ ሐዲድ ዐባይ በለትናት እብ ብኩይ ዐለ። ወለ ሰነን ዶል ለሐሸራት ልትረኤ ዲብ እሊ መክዘን እሊ እንዴ መጽአው ምኑ ነሰኦ ወዲበ አካነትለ ሐሸራት ረሸርሾ ዐለወ።”

እተ ወክድ ለሀይ ፋሩሰታሌ ለልትበህሎም ዲብ እለ መዲነት ዐለው ልትበህል እብ ክሰሰ እሎም ሚ ወቴልከነ እተ ልብል ሰኣል ዲብ በልስ አሲድ መሐመድ ዐብደላ፡ “እተ ወክድ ለሀይ ለዐለው ፍሩሰታሌ መራቀብት ትርድት

ብዘሕ ዐለ። እሊ ህይ ምሮ ምን ጀላል ነቅፈ እት ዘበን በዲር ለዐላ ቲ።

እተ ናይ ሰብክ ወሰግም ህይ ከንቲባይ ናይ ሰብክ ተንብህ አፍገረ ምንገብእ ክሉ ለሸዐብ እግል ሰብክ ብርንቶ ገብእ። እብ አሳሰለ ተንብህ ህይ አሰልፍ ለአንውየት ቀደም ለሐልፍ ወሐር ለዐድ እብ መጽዕኑ ለዐርዩ። እትሊ ለሸዐብ ሕድ ሰዴ፡ ገመል ለአለቡ ጎረት ልቡላ፡ ለእንሰ ለዐድ ለቀዳም ክምስል አግዐዘት እብ አሰር ግረ እንዴ አቅበለት እግለ ታርፍ ለህለ ሸዐብ ተትዐሬ ዐለት። ከሸዐብ ነቅፈ እት ድጌሁ ልግበእ ውዲብ ሰብክ ወሰግም ሕድ ሰዴ ወሕድ ለዓውን ወእብ ረሕመት

ምን ሕላይ ቀዳምያም


ምን ሐልየት ዐድ ተክሊስ መሐመድ ወድ ግርሚት እግል እዛዝ ወድ ጀሚል ለሐለየ እብ አሩይ ከም አተ

ለአጽጋማቲ እግል ንሓኬ - ገድም ለአጃል ቀርቦዩ
ወዴ ቲ ዐለ ከትገሰ - ባይራይ ለዕሉም እደዩ
ቁሽ ዛምት ቲ ለእት ማርየ - ዘረ እንዴ ተዐደዩ
ሽሑም ወመሓዝ ምሽልታፍ - ጌሰ ህቲ ለሐጠዩ
ቤት ሙሽ ዛምት ቲ - ለአሩይ ምነ አተዩ
ለድጌ ዋዝንተት - ሰኒ ወእማን ደዐከዩ
ለድጌ መራጋዝ - እብ እገሩ ረድህዩ
መነሰዕ ዛምት ቲ - ሐሊቦታት ለደሀዩ
ለድጌ አፍ-ዐበድ - ሰለስ ሰነት ሰክነዩ
ገሌ ለሕጻጽ ዘብጠ ቡ - ወገሌ ጎሁ ሰቅለዩ
ፍጉር ናይር ቲ መምባይ - ለበዓላት ክምስል ሐልፈዩ
ወርሕ ሳምን ቀረማን - ለሞዳይ ሕበር አብርሀዩ።

እለ ከም ሐለዩ ወአት ሀበዩ። ህቲ ህይ ለወአት ቀበዩ ከከርዐ አጽቢሐ። ሐር እዛዝ ለሐ ለእለ ዘምተ እግል ለአግዕዝ ምን መጽእ እለ ሕላየት ሐለዩ።

ዎ ዕሉም እልክ እት እብል - ለጸርዩ ዳለ ከጌሰ
ለእለ ሐምረግዝ - ወለእለ አጽሬክ
ለእለ አብሸልክ - ወለእለ አጥሬክ
ሐቲ እንጆት እብ በና - ከአፎ ትድሬኦ አፈተ
እግርዩ ሐቀክ - ኖሰ ውዕለት ተ እት ቤተ
እለ ክምስል ሐለዩ ወአት ወሰክዩ።

ዴማት ክታብ ሐልየት ትግራይት 1913



ጅግራታት ርዕደት መዳርስ ምዴርየት ቅብለት ምውዳቅ ጸሐይ እስመረ እንበት



ጅግራታት ርዕደት መዳርስ ፈሬዕ ተዕሊም ምዴርየት ቅብለት ምውዳቅ ጸሐይ አቅሊም ምግብ ለሐልፈህ ሰነብት አንበተ።

እሊ እት ፍንጌ 10 መአንብታያት ወሰቦዕ ናይ ምግባይት ደረጃት መዳርስ እብ ውላድ ወአዋልድ ገብእ ለሀላ ጅግራታት፡ ኩረት እግር፡ ሹሊቦል ወኩረት ሰለት ለሽምል ቲ።

እብ አሳስ እሊ፡ እት ኮበሪት እግር አዋልድ መአንብታይት ደረጃት ሞግር 10 ወ11 ሰነት፡ መድረሰት አስሙድ እግል መድረሰት ፍሬሂወት 1-0፡ መድረሰት እምባጠቀረ እግል ሰሜናዊት አስመረ 2-0፡ መድረሰት ማይ-ተመናይ እግል ምራራ 3-0 ቀልበያህን። መዳርስ ማዕርነት ወዕዲ ንፋስ ህዩ 0-0 ትፈናተዩ።

እት ነፍሱ ለዕምር ውላድ፡ መድረሰት ምራራ እግል ማይተመናይ 1-0፡ ፍሬሂወት እግል አስሙድ፡ ሰሜናዊት እግል ሓምድ እድሪስ ዐዋቲ 2-0፡ ወመድረሰት ማዕርነት እግል ዐዲ-ንፋስ 3-0 ቀልበም።

እት ጅግራታት መዳርስ ምግባይት ደረጃት ኮበሪት እግር አዋልድ ሞግር 12 ወ13 ሰነት፡ መድረሰት ሄለል ሰብተምበር እግል መድረሰት ፍትሒ 1-0፡ እምባጠቀረ እግል ድዩእ 2-0፡ ወመድረሰት ዋርሳይ እግል ዐዲንፋስ 3-0፡ ቀልበያህን።

ሞግር 12 ወ 13 ምን ውላድመ፡ ሄለል ሰብተምበር እግል ፍትሒ፡ ወመድረሰት እምባጠቀረ እግል ድዩእ ሕድ እበ ሹቡህ 1-0 ዲብ ቀልቦ፡ ዋርሳይ እግል ዐዲ-ንፋስ 4-0

ቀልበው።

እት ሹሊቦል መዳርስ ምግባይት ደረጃት አዋልድ፡ ድዩእ እግል ፍትሒ፡ ሄለል ሰብተምበር እግል ዋርሳይ፡ እምባጠቀረ እግል ዐዲንፋስ፡ እብ ሕድ መሰል ንቀጥ 2-0 ቀልበያህን። ምን ውላድ ህዩ፡ እምባጠቀረ እግል ዐዲ-ንፋስ 2እብ1፡ ፍትሒ እግል ዲዩእ፡ ክምሰልሁመ ሄለል ሰብተምበር እግል መድረሰት ዋርሳይ 2እብ0 ቀልበም።

እት ኮበሪት ሰለት አዋልድ፡ እምባጠቀረ እግል ፍትሒ 8እብ2፡ ሄለል ሰብተምበር እግል ዋርሳይ 41እብ1፡ እብ ጀህት ውላድ ህዩ፡ እምባጠቀረ እግል ፍትሒ 20እብ9፡ ሄለል ሰብተምበር እግል 21እብ13 ክም ቀልበው፡ ፈሬዕ ተዕሊም አቅሊም ምግብ አክደ።

ሊቨርፑል እት አዝመት እዳረው ወሕው' ናሁ

ፈሪቅ ሊቨርፑል ለሐልፈት ሰንበት ዐባይ ምን ገጽ ምሴ እት ምስል ማንሲቲ ለወደየ ሐረከት ሐዋኒት ለአርእ ከለትቀለበ ዲበ ትልህዩ፡ እት አዝመት ክምሰል ሀላ ለትአርኤ ክም ተ ትሸረሐ።

እት ሚዳን እትሓድ እት ወደየ ትልህዩ ፕሪመርሊግ ለትጃገረ ሊቨርፑል፡ እብ ርሒቡ 3-0 እንዴ ትቀለበ ሸመት ከጃል ትገልበቡ። ምን አስክ እሊ ዋዲህን ለሀላ 11 ትልህዩ ናይላ ሊግ ህዩ፡ ሐምስ ዶል ቅልብ እት ሳድፋ፡ እብ 18 ንቅጠት እት ሳምናይት ደረጃት ሰቡረት ፕሪመርሊግ ታብሪክ ዋዲ ሀላ።

ምን መሬሕ ለሀላ ፈሪቅ አርሰናል ህዩ እብ ሰማን ንቅጠት ድንገር ሀላ። ሊቨርፑል ምን 11 ትልህዩህ፡ ለሰባዕ ለትቀለበ ዲበን ተን።

“እሊ መደት አዜ ሊቨርፑል እት አዝመት እኪት ሀላ” ለቤላ መተልህያይ ማንዩድትድ ሮይ ኬን፡ “ከረ ማንቴስተር ሲቲ ምን ቀሉቡ ደሐን ቲ፡ ሰበቡ ህዩ እት ሚዳናም እግል ትቅለቦም ክቡድ ሰበት ቲ። ምናተ፡ እት 11 ትልህዩ ሰባዕ ዶል ልትቀለብ ዲብ ሀላ፡ ወሐምስ ምን ዲብ ፕሪመር ሊግ እግል ልትቀለቡ፡ ሊቨርፑል እት ሓለት ሰጌት ክም ይህላ ቲ ለልአርኤ” ቤላ።

መተልህያይ ኬን፡ ፈሪቅ ማንሲቲ እት ቲክኒክ ምን ገብእ ወበቃዕት ምስል ሊቨርፑል እት ልትመጣወር እዴ ለዓለት ክም ዐለት እሉ ወደሐ።

“ሊቨርፑል እብ ኩሉ ጀዋንቡ፡ ሐዋን ዐላ፡ እብ ቅያር ለአተው መተልህየትመ ሐዋንያም ዐለው። ክም በሊሰለ አተ ዲቦም አግዋልመ ተረቶም ኢትፈደው። እሊ ፈሪቅ እብሊ ተዩልሉ ላተ እት ካስ እግል ትሰአዩመ ኢትቀድር።” ወሰኩ።

መተልህየት ሊቨርፑል መቅደረት ክም ቦም ምንመ ልትሸረሐ፡ በቃዕቶም ዲብ አካነት እንዴ አቅበለት ፈሪቅም መትጃግራይ እግል ልግበእ ላቲ፡ ወቅት ክም ለአትሐዝዮም ለትፈናተው መሐልሊን ርዕደት ለሀድጎ።

መዳፍዓይ ማንቴስተር ዩናይትድ ለዐለ - ጋሪ ኔቭል'መ፡ እት በቃዕት ሊቨርፑል ዲብ ልትጎን፡ “መተልህየት ሊቨርፑል ደማን ነፍሰ ሐግለው።

ረብሸት ለብእቶም መሰሉ። እገሮም ደለ እለ ጀረበ ኢትነሰረት። ምስላ ሐልፈህ ስኒን ዶል ልትጃገሮ፡ ሊቨርፑል ሰሜቲ ትከሬት” እት ልብል ቀበዮም።

ኒኮ ጎንዛሌዝ ለዘብጠዩ ኮበሪት ህዩ፡ ምስል ሻን ዳይክ እንዴ ትዳገሸት ለ2ይ ጎል ትሰጃለት። “ሻን ዳይክ ኩረት እግል ትዝበጡ አስኩ ዲብ ትሄርር ትም ቤላ ከጸንሐዩ፡ ዐጃይብ ቲ፡ እብ ዓመት ዲብ ኩላ ለአርአወ ትልህዩ ትቀለበው” ወሰኩ።

እትለ ማንሲቲ ሃላንድ፡ ጎንዛሌዝ ወዶኩ እበ አተወ እሉም አግዋል ለትዐወተው ዲበ ትልህዩ፡ ኩላ ትልህዩ ሐን መራቀብቶም አተወ። ሲቲ እብ እዴ ለዓለት ለሐወጸት ዲበ ምሴት፡ ዶኩ እብ ድገለባይ ደንበር ከዋ



LIVERPOOL 'IN CRISIS'

ድባርዋ፡ ጅግራታት ዐጃለት ዲቪዝዮናት ልቲላሌ ሀላ

ብድረ ዐጃላት ማውንቲን ባይክ ምዴርየት ድባርዋ፡ ሰንበት ዐባይ እግል ሳልስ ሳምንቲ አተላላ። እብሊ፡ 20 ኪሎምትር (13 ዱረት) እት ለትጃገረው ዲቪዝዮን አርበዕ፡ ናኦድ ዑቅባይ፡ ፋንኤል እስቲፋኖስ፡ አቤል በረከት፡ ዮናታን ሳምኤል፡ ናትናኤል ዮሃንስ ወአቤል ዮውሀንስ፡ ምን አወላይ አስክ ሳድሳይ ተርቲብ አተው።

ሳልሳይ ዲቪዝዮን ህዩ 15 ዱረት

መትባድረት ለአሻረከው ዲቦም መትጃግረት አወላይ ዲቪዝዮን 59.2 ኪሎምትር መሳፈት ትዳሌት እሉም። ሚላዊ ሳምሶን ምን ናዲ ራህዋ ህዩ፡ እግል ውላድ ፈሪቁ ሙሴ ኢሲያስ ወተመሰገን እያሱ እንዴ አጅገረ ሰልፋይ አተ። ሴም ዳዊት - ምን ናዲ ሓድነት፡ ያፌት የማኔ - ምን ናዲ ራህዋ፡ ወዘራኤል አማንኤል - ምን ናዲ ሓድነት አስክ ሳድሳይ ደረጃት ጸብጠው።



ሄረረው። ብርሃኔ ይብራህ፡ እግል ዐወት ጉርጃ፡ ሄናክ ፍትሓዊ፡ ኤፍሬም ሰዩም፡ ሲራክ የዕብዮ ወመዋእል ጎይትአም እንዴ በድረ ተዐወተ ዲቡ።

ካልኣይ ዲቪዝዮን 30 ዱረት እት ሄረረው ዲበ ጅግራ፡ ሳይሞን ዮናስ ምን ፈሪቅ ሰላም፡ ተመሰገን ተክሉ - ናዲ ሓድነት፡ ሰነድ ሳይሞን - ምን ናዲ ራህዋ፡ ብእምነት ርእሶም - ምን ናዲ ሰላም፡ ምክኤሌ ሀይሌ ወዮናታን አስመሮም ምን ናዲ ራህዋ ምን አወላይ አስክ ሳድሳይ አተው።

ሰለስ ፈሪቅ በሀለት ናዲ ራህዋ፡ ሓድነት ወሰላም እብ ዓመት 30

እምበል እሊመ፡ መጃገረት አዋልድ እት ለትደሀረት ደረጃት ዲበ ትከሬት እቲ ወክድ፡ ልዋም ክዳሚግርያም - ምን ሓድነት፡ ሳምራዊት ደበሳይ - ምን ናዲ ሰላም፡ 15 ዱረት እት ገልበባዩ ዲበ ጅግራ፡ ደርብ ሕድ አተዩ። ቅድረት ለበን አዋልድ መትባድረት ዐጃላት ናይላ መዲነት ወምዴርየት እግል ልትጃገረ ህዩ ለከሰስ ጀህት ሕሰር እግል ተሀቡ ተውሰዩት ትቀደሙት።

እሊ ጅግራ፡ ለትመጽእ ሰንበት ዐባይመ እግል ለአተላሌ ክምሰል ቲ፡ ወኪል ውካለት አክባር ምዴርይተ ድባርዋ ሐበረ።

ድሬዕ ሊቨርፑል ዲብ ሻዋቅ፡ እት ሃገንት ተሸኪሎም ዶር ዐቢ ተልሀ። ሃላንድ ወዶኩ፡ እብ ምድር ወሰመ ለመጽአዮም ክወር እት ፍገራት እግል ልበድሎ ለአርአወ ሐዞት ሊቨርፑል ኢክሀለው። እት ብቀት ለትካረ ሊቨርፑል ምን ለገብእ ወክድ ወለዐል ለትአክጅል ሓለት ዲበ ትካረ።

ደዓም ሻምፕዮን ፕሪመር ሊግ ለሀረስ ፈሪቅ ሊቨርፑል፡ ኮበሪት እት ትትነሰእ ምኖም ለዐለት አውካድ፡ እንዴ ኢልትዝዋ ሀድፍ ጅሁም ማንሲቲ እት ገብእ ትረአው።

እትለ ትልህዩ እለ ግድም ሊቨርፑል ቅድረቲ ምድር ልድድት ክም ህሌት ለትዋቀን ዲበ መቅደረት

ሐዋኒት ትረኤት ምን። እት መጽእ አውካድ ቅሩቡ፡ ምን ጅግራታት ፕሪመርሊግ ናይ ክልኤ ሳምን ዕርፍ እግል ልርኩብ ሰበት ቲ፡ መደርቦም ስሎት፡ ገሌ ተቃዩር እግል ለአምጽእ ከለአቅብል እቦም ልትሰኤ። ማንቴስተር-ሲቲ ሳኪን እት ናይ ደዓም ለሀ ፍድቡ ለአቅብል መሰል።

ሊቨርፑል ምን ሐወኑ ክም በክት ሰኒ ለረክበዩ አርሰናል ህዩ፡ ማን-ሲቲ መትጃግራዮም ክም ቲ አክል-ሕድ ባይን እሉም ሀላ። አስክ እለ ለፈርግ ዲብ አርበዕ ንቅጠት ሜብብ ሀላ። ለትልህዩ፡ መደርብ ማንሲቲ ፔፕ ጃርድዮላ፡ 1000 ጅግረ ለአትዐለበ ዲበ መናሰበት እት ገብእ፡ 716 ምን እሊ ትልህዩታት እቲ ዕዉት ቲ። ገሌ ምን ዐውቲታቲመ፡ 156 ኢነት ደርን፡ 128 ኢነት ቅልብ፡ ወ40 ኢነት ህዩ ካሳት ለትሆገል ፔፕ-ጃርድዮላ ለሸን ዲበ ምሴት ዐለት።

ህዝባዊ መንግሥት አብ

‘ሐሽም አቢይ’ ዲብ እለን ለሐልፊዩ ክልኤ ሰነት፡ እግል ስያደት ኤረትርያ ወውሕደት አርደ እበ ከሰሰ እብ ትሉሉይ ወብዙሕ ህላፍቲታት



ለኢትዮጵያ መተቅብል ይህለ። ኩለ ለቀዳመ መክሐደ፡ ቃትናይ ወተኢሪካይ አሳስ ለአለበ ደዓያት ብራቁ ሌጠ ተ። ሐሰት ትደጋገም እት ህሌት ላኪን፡ ዐቅል አዳም ለሕያይ እንዴ አክሰሐት፡ አማን እግል ትምሰል ሰበት ትቀድር፡ (ሰትራተኛዮት ‘ሐሽም አቢይ’ መ ህታ ተ)፡ እግል ዲብ ለትፈናተ ወክድ ለቀዋቁሉ ደዓያት ሐሰት ወሐምላት እብ ናይ ተኢሪካ ሐቃይቅ ወእስባት አፍሽሎቲ ህይ ምህምቲ።

1. ዘበናያት ድወል አፍሪቅዮ ነቲጀት እስትዕማራት አርብ ተን። ቀደም እስትዕማር አርብ፡ ሽዕብ አፍሪቀ ዓዳት ዐለ እግሉ፡ መባትክ ሲያሲ ላኪን ዲብ ወራራት ወዳፍዐት ወራራት ለተንከበ ወእብ ሐርብ ለበደ መምላካት ወሽብህ መምላካት እንዲኢኮን እብሊ ናይ አዜ ሸክል ለልትሸረሐ ወናይ እድንያይ ውዕላት ለትአሰሰዮ ድወል ኢዐሊዮ። ሰበት እሊ እብ ቅወት ዐስከርየት እንዴ ዐመምክ ለጸብዋኪህ፡ አሰክ ቅወት ህሌት እግልክ ትደይሩ፡ ብዕዳም ቅወት ክም ረክበው ህይ እብ ቅወት ዐስከርየት እንዴ ነዘው ደይሩ። እሊ ሐቅይቅ ተኢሪካ እሊ ላኪን እብ ለገብአ ክም ቅራመት፡ ሰኣል ወልትበጽሐኒ ዲብ እለን ዘበናያት ድወል እግል ልትብህል እልትቀደርኒ።

2. ዲብ አፍሪቀ ለህለዩ ድወል ኤረትርያ፡ ሱዳን፡ ኦቶብዩ፡ ጅቡቲ ወሶማል ክም ክለን ድወል አፍሪቀ ለብዕዳት እስትዕማራት አርብ ወውፋቃት እስትዕማር ለወልደየን ተን። ኢጣልዩ ዲብ 2ይ ሐርብ እዲን ክም ትፈለለት፡ በክት ናይሊ ዲብ ሐን እስትዕማር ለዐለዩ ድወል (ኤረትርያ፡ ሶማሊያ ወሊብዩ) ሚ



ልግበእ እንዴ ትብህለ ክም ተህደጋ ቡ፡ ሊብዩ ወሶማል ሕርየት ልርከበ ትብህለ። ቀድሞት ኤረትርያም ድራሳት ገብአ እተ። እብ አሳሰለ ድራሳት ለበዘሐ ሽዕብ ኤረትርያ ሕርየት ክም ለሐዜ እኩድ እት ህለ ላኪን፡ አሚሪክ እብ ገበይ መዝመት መጅልስ ቅራን ምራድ ወአኖካይ ሕርየት ሽዕብ ኤረትርያ እንዴ ኬደት፡ ምሰል አቶብዩ እብ ፈደሬሽን ክም ትትጽ’መድ ወዴት።

እተ ወክድ ለህይ ወኪል አሚሪካ፡ “እብ ዕን ዐድል ልትርኤ እት ህለ፡ ረኣይ ሽዕብ ኤረትርያ እት ሕሳብ እግል ልኢቲ ዐለ እግሉ። ምናተ እግል ስትራተኛያይ መሳልሕ ወዲብ በሐር ቀዩሕ መስኩብት ወአምን እዲን እግል ለህሌ እንዴ እንኬ፡ ኤረትርያ እብ ፈደሬሽን ምሰል መሰንዩትን አቶብዩ እግል ትትቀረን ቅራም ህሌን” ልብል እት ህለ፡ ጀላብ መሳልሐም፡ ሽዕብ ኤረትርያ ክም ጨቅጠው እግል ኩለ እዲን እብ ዛህር ተሃገው። እግሉ ናይ ፈደሬሽን ቅራር ወእግሉ አሰሩ እግል ልግበእ ለትሐዘ ዐሚም ኤረትርያ እብ አቶብዩ ገበይ እግል አጣፍሐት ለትመሀዘት ስለል ሲያሰት ተ ለዐለት። ቀሪን ኤረትርያ ምሰል አቶብዩ ግድም፡ አሚሪክ ምሰል ሐቅ 2ይ ሐርብ እዲን ለሀንደሱቲ ንዛም እዲን ዲብ ፍዕል እግል ልውዐል ወስትራተጂ ወመሳልሕ ፎዘ እት ረኣሰ ቅብላተ ለዐለዩ እግል



ሕርየት፡ ረስሚ ቃትናይት ካቲመ ወናይ አማን ምራድ ሽዕብ ክምተ፡ እግል እዲን እግል ለአርኤ እስትፍተኢ

እግል ልግበእ ቀረረ።

5. እስትፍተኢ፡ እድንያይ መቀየሲታት ለአታመመ ሕር ዓድል ክምቲ እግል አድመኖት ዲብ ገጽ መጅተማዕ እዲን ረስምየት እግል ልርከብ መዝመት መጅልስ ቅራን ክም መትፈርጃይት እግል ትኢቲ፡ ናይ ዶሉ ሕኩመት ኤረትርያ ዐዘመተ ቀደመት ዲብ። መዝመት መጅልስ ቅራን ላኪን፡ “ኤረትርያ ልሳዕ ዕዱ ሰበት ኢገብአት እግል ትዕዘም ኢትቀድር። ዕድውየት ላበን ድወል ተን እግል ልዕዘማን ለወጅብን” እንዴ ቤለት እተ



ወክድ ለህይ ምን ተኢሪካ ለሬመ ዋጅብ እግል ትትብሬ ጀረበት። ገሌ ድወል፡ “አሆ እብ ገበይን ኢገዐዝመ እግልኩም” ለትብል ፍክረት ምንመ አምጸአዩ፡ ጀብህት ሽዕብየት ላኪን



ኢትፈገዐት እለን። “ሕርየትን እብ መሪር ንዓል ወእስትሸሃድ ቃሊ ናይ ሽዕብ ለአክድናህ ሰበት ተ፡ ምስተቅባል ሽዕብ ናይ ብዕዳም መድሐር ለነሐዜ እሉ ጋር ኢኮን። እለ ዱለትናተ፡ ዲብ መሲር ዱለትን ህይ ኖሰናቲ ለነዐዝም። መዝመት መጅልስ ቅራን ክም መትፈርጃይት እግል ትሻርክ ተሐዜ ገብአት ምን ገብእ ትምጽእ። እብ አንፋረ ድወል ዐዘመት ቲ ለእመጽእ ትብል ህሌት ምንገብእ ላኪን፡ ሸቅል ወቀይ ፊፈረንደም ሐቅ ስያደት ሽዕብ ኤረትርያ ሰበት፡ ሕነ እግሉ ሸቅል እግል ነኡተላልዩቲ።” ለልብል ትሩድ በሊስ ክም ሀበት፡ መዝመት መጅልስ ቅራን ክም መትፈርጃይት እብ ዐዘመት ኤረትርያ እግል ትሻርክ ክም ትሰ’ሚሕ አትአመረት ወክም መተቅብላይት ሻረከት።

6. ለዲብ እስትፍተኢ እት ሽዕብ ኤረትርያ ለትቀደመ ሰኣል፡ “ኤረትርያ ሕር ወሲያደት ለበ ዱለት እግል ትግባእ ተኣይድ መኢፋልክ” ለልብል ገብእ እት ህለ፡ “አይወ” አው “ኢፋሉ” ለልብል ሕርያናት ትቀደመ እቲ። 99.8% ምን ሽዕብ ኤረትርያ ህይ፡ “ኤረትርያ ሕር ወሲያደት ለበ ደውለት እግል ትግባእ ኣሐዜ” ቤለ ከበልሱ። እግሉ ቀደም 40 ሰኖታት ለኢረክበዩ ሕቁቅ አክደ ወአሰበተ። ፍገሪት እስትፍተኢ ህይ ተኣምርተ ናይሊ ዲብ 1950ታት ለትነፈገ ላዚ ሕርየት ሽዕብ

ኤረትርያ እብ ሰባት ለአክደት ተኢሪካይ ሐደስ ተ ለዐለት። ሽዕብ ኤረትርያ ዲብ 1940ታት ወ1950ታት ሕርየቲ እብ ሰላም ወሲያሰት ምንመ ሐዘዩ ኢረክበዩ። ምን 1960ታት አሰክ 1991 ህይ እብ መሪር ግድለ ሰለሕ ሐዘዩ ወአክደዩ። ዲብ 1993 ህይ፡ ለዲብ 1940ታት ወ1950ታት ለትሐረመ ምኑ ሐቅ እብ ገበይ ረስምየት ወቃትንዩት ካቲመ ወደ እሉ።

መከምከሚ-

ሽዕብ ኤረትርያ ሕርየቲ እት እዲሁ ለሀበ አው እብ ገበይ ሰላም እት ለሐዘዩ ለደሕረት እሉ ጀሀት ይዐለት። ሽዕብ ኤረትርያ እብ ደሙ ወክርንቲ ሕርየቲ አምጸአ። መጅተመዕ እዲን ህይ፡ እብ አሳስ እድንያይ ቀዋኒን እግል ኤረትርያ ክም ሕር ወሲያደት ለበ ዱለት እስትፍተኢ ሀበዩ። እተ ወክድ ለህይ ዲብ አቶብዩ ሰልጠት ዳብዋ ለዐለ ንዛም’መ፡ ክም ክለን ሕኩማት ድወል እዲን ነቲጀት እስትፍተኢ እንዴ ሐሸመ፡ ሕርየት ኤረትርያ ትከበተ ወአምን እበ ወምን አሚኑ ወኪን ብዕድ ሕርያን ኢዐለ እግሉ። ናይሊ ንዛም ለህይ ወሐቀሁ ዲብ ደውለት ለመጽአው አንዝመት ረስምየት እብ ኤረትርያ አዕተራፍ ወይአዕተራፍ እግሉ ሽዕብ ኤረትርያ እብ ግድለ ሰለሕ ወእስትፍተኢ ለአክደዩ ሕርየት ለከርዑ አው ግሪ ለበልሱ እግል ልግበእ ኢቀድር። ሕርየት ወሲያደት ኤረትርያ ቀረረት ሕቁቅ ሽዕብ ኤረትርያ እንዲኢኮን ናይ አቶብዩን ኢኮን። ሰበት እሊ “እብ ሕርየት ኤረትርያ ለአዕተራፍናህ እግል ንስሐብ እቲቲ” ለትብል ቅራመት ‘ሐሽም አቢይ’፡ እግል ሽዕብ ኤረትርያ ሕርየቲ እግል ልንዝዎ ወውሕደት አራዲሁ እግል ልጫርሞ እንዴ ቤለው ናይ መግለል ከዋውት ነስአው ምንገብእ፡ ክመ ርኢስ ደውለት ኤረትርያ ርኢስ ኢሲይያስ አፍወርቂ ለበለዩ፡ “ምን ዱለትን እግል ንዓፊዕ፡ ናይሊ ገብአ ልግበእ እንክር እጃዘት ለነሐዜ እሉ ጋር ኢኮን” ሌጠ እንዴ ኢገብእ፡ ናይ ዲመ መሸክል ለገብእ እትን (existential threat) እግል ንመርኬመ፡ ቃትናይ ሕቁቅ ክም ብናመ እግል ልትአመር ለወጅቡ ቲ።

ዓማት- National Interest